

四庫全書

史部

欽定四庫全書

史部

舊唐書卷三十五至

詳校官編修臣曹城

洗馬臣王坦修覆勘

覆校官主事臣李駿

校對官中書臣朱圻

謄錄監生臣伍士鵬

欽定四庫全書

舊唐書卷三十五

後晉司空同中書門下平章事劉 昫撰

志第十五

天文上

易曰觀乎天文以察時變是故古之哲王法垂象以施  
化考庶徵以致理以授人時以考物紀修其德以順其  
度改其過以慎其災去危而就安轉禍而為福者也夫

其五緯七紀之名數中官外官之位次凌歷犯守之所主飛流彗孛之所應前史載之備矣武德年中薛頤庾儉等相次為太史令雖各善於占候而無所發明貞觀初將仕郎直太史李淳風始上言靈臺候儀是後魏遺範法制踈畧難為占步太宗因令淳風改造渾儀鑄銅為之至七年造成淳風因撰法象志七卷以論前代渾儀得失之差語在淳風傳其所造渾儀太宗令置於凝暉閣以用測候既在宮中尋而失其所在玄宗開元九



年太史頻奏日蝕不効詔沙門一行改造新厯一行奏云今欲創厯立元須知黃道進退請太史令測候星度有司云承前唯依赤道推步官無黃道游儀無由測候時率府兵曹梁令瓚待制於麗正書院因造游儀木樣甚為精密一行乃上言曰黃道游儀古有其術而無其器以黃道隨天運動難用常儀格之故昔人潛思皆不能得今梁令瓚創造此圖日道月交莫不自然契合既於推步尤要望就書院更以銅鐵為之庶得考驗星度

無有差舛從之至十三年造成又上疏曰按舜典云在  
璿樞玉衡以齊七政說者以為取其轉運者為樞持正  
者為衡皆以玉為之用齊七政之變知其盈縮進退得  
失政之所在即古太史渾天儀也自周室衰微疇人喪  
職其制度遺象莫有傳者漢興丞相張蒼首創律厯之  
學至武帝詔司馬遷等更造漢厯乃定東西立晷儀下  
漏刻以追二十八宿相距星度與古不同故唐都分天  
部洛下閤運算轉厯今赤道厯星度則其遺法也後漢

永元中左中郎將賈逵奏言臣前上傅安等用黃道度  
日月弦望多近史官壹以赤道度之不與天合至差一  
日以上願請太史官日月星簿及星度課與待詔星官  
考校奏可問典星待詔姚崇等十二月皆曰星圖有規  
法日月實從黃道官無其器不知施行甘露二年大司  
農丞耿壽昌奏以圓儀度日月行考驗天運日月行赤  
道牽牛東井日行一度月行十五度至婁角日行一度  
月行十三度此前代所共知也是歲永元四載也明年

始詔太史造黃道銅儀冬至日在斗十九度四分度之一與赤道定差二度史官以校日月弦望雖密近而不為望日儀黃道與度運轉難候是以少終其事其後劉洪因黃道渾儀以考月行出入遲速而後代治厯者不遵其法更從赤道命文以驗賈逵所言差謬益甚此治厯者之大惑也今靈臺鐵儀後魏明元時都匠斛蘭所造規制朴畧度刻不均赤道不動乃如膠柱不置黃道進退無准此據赤道月行以驗入厯遲速多者或至十七

度少者僅出十度不足以上稽天象敬授人時近秘閣  
郎中李淳風著法象志備載黃道渾儀法以玉衡旋規  
別帶日道傍列二百四十九交以携月游用法頗雜其  
術竟寢臣伏承恩旨更造游儀使黃道運行以追列舍  
之變因二分之一以立黃道交於軫奎之間二至陟降  
各二十四度黃道之內又施白道月環用究陰陽朏朒  
之數動合天運簡而易從足以制器垂象永傳不朽於  
是玄宗親為製銘置之於靈臺以考星度其二十八宿

及中外官與古經不同者凡數十條又詔一行與梁令瓚及諸術士更造渾天儀鑄銅為圓天之象上具列宿赤道及用天度數注水激輪令其自轉一日一夜天轉一周又別置二輪絡在天外綴以日月令得運行每天西轉一帀日東行一度月行十三度十九分度之七凡二十九轉有餘而日月會三百六十五轉而日行帀仍置木櫃以為地平令儀半在地下晦明朔望遲速有準又立二木人於地平之上前置鐘鼓以候辰刻每一刻

自然擊鼓每辰則自然撞鐘皆於櫃中各施輪軸鈎鍵  
交錯關鑠相持既與天道合同當時共稱其妙鑄成命  
之曰水運渾天俯視圖置於武成殿前以示百寮無幾  
而銅鐵漸澁不能自轉遂收置於集賢院不行復用今  
錄游儀制度及所測星度異同開元十二年分遣使諸  
州所測日晷長短李淳風僧一行所定十二次分野武  
德已來交蝕及五星祥變著于篇

黃道游儀規尺寸旋樞雙環外一丈四尺六寸一分豎

八分厚三分直徑四尺五寸九分即古所謂旋儀也南  
北斜兩極上下循規各三十四度兩面各畫周天度數  
一面加釘並用銀飾使東西運轉如渾天游儀中旋樞  
軸至兩極首內孔徑大兩度半長與旋環徑齊並用古  
尺四分為度玉衡望筒長四尺五寸八分廣一寸二分  
厚一寸孔徑六分古用玉飾之玉衡衡施於軸中旋運  
持正用闕七曜及列星之濶狹外方內圓孔徑一度半  
周日輪也陽經雙環外一丈七尺三寸內一丈四尺六



寸四分廣四寸厚四分直徑五尺四寸四分置於子午  
左右用八柱相固兩面畫周天度一面加釘並銀飾之  
半出地上半入地下雙間挾樞軸及玉衡望筒旋環於  
中也陰緯單環外內廣厚周徑皆準陽經與陽經相銜  
各半內外俱齊面平上為天以下為地橫周陽環謂之  
陰渾也面上為兩界內外為周天百刻平上御製銘序  
及書並金為字天頂單環外一丈七尺三寸豎廣八分  
厚三分直徑五尺四寸四分當中國人頂之上東西當

卯酉之中稍南使見日出入令與陽經陰緯相固如殼之裏黃南去赤道三十六度去黃道十二度去北極五十五度去南北平各九十一度強赤道單環外以一丈四尺五寸九分橫八分厚三分直徑四尺九寸赤道者當天之中二十八宿之列位也其本後魏解蘭所造也因著雙規不能運動臣今所造者上列周天星度使轉運隨天仍度穿一穴隨元退交不有差謬即知古者秋分日在角五度今在軫十三度冬至日在牽牛初今在

斗十度擬隨差却退故置穴也傍在卯酉之南上去天頂三十六度而橫置之黃道單環外一丈五尺四寸一分橫八分厚四分直徑四尺八寸四分日之所行故名黃道古人知有其事竟無其器遂使太陽陟降積歲有差月及五星亦隨日度出入規制不知準的斟酌為率踈濶尤多臣今創置此環置於赤道環內仍開合使隨轉運出入四十八度而極畫兩方東西列周天度數南北列百刻使見日知時不有差謬上列三百六十策與

用卦相準度穿一穴與赤道相交白道月環外一丈五尺一寸五分橫度八分厚三分直徑四尺七寸六分月行有迂曲遲疾與日行緩急相反古無其器今創置於黃道環內使就黃道為交合出入六十度以測每夜行度上畫周天度數穿一穴擬移交會並用銅鐵為之李淳風法象志說有此日月兩環在旋儀環上既用玉衡不得遂於玉衡內別安一尺望筒運用既難其器已濫游儀四柱龍各高四尺七寸水槽山各高一丈七寸五

分槽長六尺九寸高廣各四寸水池深一寸廣一寸五分龍者能興雲雨故以飾柱柱在四維龍下有山雲俱在水平槽上並銅為之游儀初成太史所測二十八宿等與經同異狀角二星十二度赤道黃道度與古同舊經去極九十一度今則九十三度半星經云角去極九十一度距星正當赤道其黃道在赤道南不經角中今測角在赤道南二度半黃道復經角中即與天象符合亢四星九度舊去極八十九度今九十一度半氏四星

十六度舊去極九十四度今九十八度房四星五度舊去極一百八度今一百一十度半心三星五度舊去極一百八度今一百一十一度尾九星十八度舊去極一百二十度一云一百四十一度今一百二十四度箕四星十一度舊去極一百一十八度今一百二十度南斗六星二十六度舊去極一百一十六度今一百一十九度牽牛六星八度舊去極一百六度今一百四度須女四星十二度舊去極一百度今一百一度虛二星十度

舊去極一百四度今一百一度北星舊圖入虛宿今測  
在須女九度危三星十七度舊去極九十七度今九十  
七度北星舊圖入危宿今測在虛六度半室二星十六  
度舊去極八十五度今八十三度東壁二星九度舊去  
極八十六度今八十四度奎十六星十六度舊去極七  
十六度一云七十度今七十三度東壁九度奎十六度  
此錯以奎西大星為距即損壁二度加奎二度今取西  
南大星為距即奎壁各不失本度婁三星十三度舊去

極八十度今七十七度胃三星十四度昴七星十一度  
舊去極七十四度今七十二度畢八星十七度舊去極  
七十八度今七十六度觜觿三度舊去極八十四度今  
八十二度畢赤道與黃道度同觜赤道二度黃道三度  
其二宿俱當黃道斜虛畢有十六度尚與赤道度同觜  
摠二度黃道損加一度此即承前有誤今測畢有十七  
度半觜觿半度並依天正參十星舊去極九十四度今  
九十二度東井八星三十三度舊去極七十度今六十



八度與鬼五星舊去極六十八度今古同也柳八星十五度舊去極七十七度一云七十九度今八十度半柳合用西頭第三星為距比來錯取第四星今依第三星為正七星十度舊去極九十一度一云九十三度今九十三度半張六星十八度舊去極九十七度今一百度張六星中央四星為朱鳥喙外二星為翼比來不取膺前為距錯取翼星即張加二度半七星欠二度半今依本經為定翼二十二星十八度舊去極九十七度今一

百三度軫四星十七度舊去極九十八度今一百度文  
昌舊二星在鬼四星在井今四星在柳一星在鬼一星  
在井北斗魁第一星舊在七星一度今在張十三度第  
二星舊在張二度今在張十二度半第三星舊在翼二  
度今在翼十三度第四星舊在翼八度今在翼十七度  
太第五星舊在軫八度今在軫十度半第六星舊在角  
七度今在角四度少第七星舊在亢四度今在角十二  
度少天關舊在黃道南四度今當黃道天江舊在黃道

外今當黃道天囷舊在赤道外今當赤道三台上台舊  
在井今測在柳中台舊在七星今在張建星舊去黃道  
北半度今四度半天苑舊在昴畢今在胃昴王良舊五  
星在壁今四星在奎一星在壁外屏舊在觜今在畢宿  
雲雨舊在黃道外今在黃道內七度雷電舊在赤道外  
五度今在赤道二度霹靂舊五星並在赤道外四度今  
四星在赤道內一星在外上公吏舊在赤道外今在赤  
道內六度虛梁舊在黃道內四度外屏舊在黃道外三

度今當黃道八魁舊九星並在室今五星在壁四星在  
室長垣舊當黃道今在黃道北五度軍井準經在玉井  
東南二斗半天桴舊在黃道北今當黃道天高舊在黃  
道外今當黃道狗國舊在黃道外今當黃道羅堰舊當  
黃道今在黃道北黃道春分之日與赤道交於奎五度  
太秋分之日交於軫十四度少冬至之日於斗牛度去  
赤道南二十四度夏至之日於井十三度少去赤道北  
二十四度其赤道帶天之中用分列宿之度黃道斜運

以明日月之行其冬至洛下閎起於牛初張衡等遷於斗度由每歲差分不及舊次也

日晷周禮大司徒常以土圭之法測土深正日景以求地中日東則景夕多風日西則景朝多陰日至之景尺五寸謂之地中天地之所合也四時之所交也風雨之所會也陰陽之所和也然則百物阜安乃建王國焉鄭氏以為凡日景於地千里而差一寸景尺有五寸者南戴日下萬五千里地與星辰四游升降於三萬里之中

是以半之得地之中焉

鄭司農云土圭之長尺有五寸以夏至之日立八尺之表其景適與

土圭等謂之地中今潁川陽城為然

謹按南越志宋元嘉中南征林邑以五

月立表望之日在表北影居表南交州日影覺北三寸  
林邑覺九寸一分所謂開地戶以向日也交州大略去  
洛九千餘里蓋水陸曲折非論圭表所度惟直考實其  
五千乎開元十二年詔太史交州測景夏至影表南長  
三寸三分與元嘉中所測大同然則距陽城而南使直  
路應弦至於日下蓋不盈五千里也測影使者大相元

太云交州望極纔出地二十餘度以八月自海中南望  
老人星殊高老人星下環星燦然其明大者甚衆圖所  
不載莫辨其名大率去南極二十度以上其星皆見乃  
古渾天家以為常沒地中伏而不見之所也又按貞觀  
中史官所載鐵勒迴紇部在薛延陀之北去京師六千  
九百里又有骨利幹居迴紇北方瀚海之北草多百藥  
地出名馬駿者行數百里北又距大海晝長而夕短既  
日沒後天色正曛煮一羊胛纔熟而東方已曙蓋近日出

入之所云凡此二事皆書契所未載也開元十二年太史監南宮說擇河南平地以水準繩樹八尺之表而以引度之始自滑州白馬縣北夏至之晷尺有五寸七分自滑州臺表南行一百九十八里百七十九步得汴州浚儀古臺表夏至影長一尺五寸微強又自浚儀而南百六十七里二百八十一步得許州扶溝縣表夏至影長一尺四寸四分又自扶溝而南一百六十里百一十步至豫州上蔡武津表夏至影長一尺三寸六分半大率



五百二十六里二百七十步影差二寸有餘而先儒以  
為王畿千里影移一寸乖舛而不同矣今以句股圖校  
之陽城北至之晷一尺四寸八分弱冬至之晷一丈二  
尺七寸一分半春秋分其長五尺四寸三分以覆矩斜  
視北極出地三十四度四分

凡度分皆以  
十分為法

自滑臺表視

之高三十五度三分

差陽城  
九分

自浚儀表視之高三十四

度八分

差陽城  
九分

自武津表視之高三十三度八分

差陽城  
九分

分雖秒分稍有盈縮難以目校然大率五百二十六里

二百七十步而北極差一度半五百三十一里八十步而差一度樞極之遠近不同則黃道之軌景固隨而遷變矣自此為率推之比歲朗州測影夏至長七寸七分

冬至長一丈五寸三分春秋分四尺三寸七分半

以圖測之

定氣長四尺四寸七分

按圖斜視北極出地二十九度半

差陽城五度三

分蔚州橫野軍測影夏至長二尺二寸九分冬至長一

丈五尺八寸九分春秋分長六尺四寸四分半

以圖測之定氣六尺

六寸三分半

按圖斜視北極出地四十度

差陽城五度二分

凡南北

之差十度半其徑三千六百八十里九十步

自陽城至朗州一千

八百二十六里百九十六步自陽城至許州橫野軍一千八百六十一里二百一十四步

北至之晷

差一尺五寸三分

自陽城至朗州差七寸二分自陽城至橫野軍差八寸

南至之

晷差五尺三寸六分

自陽城至朗州差二尺一寸八分自陽城至橫野軍差三尺一寸八

分率夏至與南方差少冬至與北方差多又以圖校安

南日在天頂北二度四分北極高二十度四分冬影長

七尺九寸四分

定春秋分影長二尺九寸三分

差陽城十四度三分其

徑五千二十三里至林邑圖日在天頂北六度六分強

北極之高十七度四分周圍三十五度常見不隱影長  
六尺九寸其徑六千一百一十二里假令距陽城而北  
至鐵勒之地亦十七度四分合與林邑正等則五月日  
在天頂南二十七度四分北極之高五十二度周圍一百  
四度常見不隱北至之晷四尺一寸三分南至之晷二  
丈九尺二寸六分

定春秋分影長  
九尺八寸七分

北方其沒地纔十五

度餘昏伏於亥之正西晨見於丑之正東以里數推之

已在迴紇之北又南距洛陽九千八百一十六里則五月

極長之日其夕常明然則骨利幹猶在其南矣又先儒以南戴日下萬五千里為句股邪射陽城為弦考周徑之率以揆天度當一千四百六里二十四步有餘今則日影距陽城五千餘里已居戴日之高則一度之廣皆宜三分去二計南北極相去纔八萬餘里其徑五萬餘里宇宙之廣豈若是乎然則王蕃所傳蓋以管窺天以蠡測海之義也古人所以恃句股之術謂其有徵於近事顧未知目視不能遠浸成微分之差其差不已遂與

術錯如人游於大湖廣不盈百里而覩日月朝夕出入湖中及其浮于巨海不知幾千萬里猶覩日月朝出其中夕入其中若於朝夕之際俱設重差而望之必將小大同術而不可分矣夫橫既有之縱亦宜然假令設兩表南北相距十里其崇皆亦數十里若置火炬於南表之端而植八尺之木於其下則當無影試從南表之下仰望北表之端必將積微分之差漸與南表參合表首參合則置炬於其上亦當無影矣又置火炬於北表之

端而植八尺之木於其下則當無影試從北表之下仰望南表之端又將積微分之差漸與北表參合表首參合則置炬於其上亦當無影矣復於二表之間相距各五里更植八尺之木仰而望之則表首環屈而相會若置火炬於兩表之端皆當無影夫數十里之高與十里之廣然猶邪射之影與仰望不殊今欲求其影差以推遠近高下猶尚不可知也而況稽周天積里之數於不測之中又可必乎假今學者因二十里之高以立句股

之術尚不知其所以然况八尺之木乎原人所以步圭  
景之意將欲節宣和氣相輔物宜而不在於辰次之周  
徑其所以重厯數之意將欲敬授人時欽若乾象而不  
在於渾蓋之是非若乃述無稽之談於視聽之所不及  
則君子闕疑而不質仲尼慎言而不論也而或者各守  
所傳之器以述天體謂渾元可任數而測大象可運算  
而闕終以六家之說迭為矛盾今誠以為蓋天則南方  
之廣漸狹以為渾天則北方之極浸高此二者又渾蓋



之家未能有以通其說也由是而觀則王仲任葛稚川之徒區區於異同之辨何益人倫之化哉又凡日晷差冬夏至不同南北亦異而先儒一以里數齊之喪其事實沙門一行因脩大衍圖更為覆矩圖自丹穴以暨幽都之地凡為圖二十四以考日蝕之分數知夜漏之短長今載諸州測景尺寸如左

林邑圖北極高十七度四分

冬至影在表北六尺九寸  
定春秋分影在表北二尺

八寸五分夏至影  
在表南五寸七分

安南都護府北極高二十六度六分

冬至影在表北七尺九寸四分定春秋分影在表北二尺九寸三分夏至影在表南三寸三分朗州武

陵縣北極高二十九度五分冬至影在表北一丈五寸三分定春秋分景在表北

四寸七分夏至影襄州恒春分影在表北四尺八寸蔡州上蔡縣武

津館北極高三十三度八分冬至影在表北一丈二尺三寸八分定春秋分影在

表北五尺二寸八分夏至影許州扶溝北極高三十四度三分冬至影在表北一丈二尺五寸三分定春秋分

影在表北五尺三寸七分夏至影在表北五尺四寸四分汴州浚儀太岳臺北極高三十四度八分冬至影

一丈二尺八寸五分定春秋分影在表北一丈五寸三分滑州白馬北

五尺五寸夏至影在表北一尺五寸三分

極高三十五度三分

冬至影在表北一丈三尺定春秋分影在表北五尺三寸六分夏至

影在表北一尺五寸七分

太原府

恒春分影在表北六尺

蔚州橫野軍北極高

三十度

冬至影在表北一丈五尺八寸九分定春秋分影在表北六尺六寸三分夏至影在表北二尺

二寸九分

舊唐書卷三十五

舊唐書卷三十五考證

天文志上在璿樞玉衡○

臣德潛

按以璿璣為璿樞避

玄宗嫌名也

問典星待詔姚崇等○

臣名南

按舊本闕問字今据後

漢志補

即知古者秋分日在角五度○此與下文冬至日在牽

牛初俱脫日字今添

而極畫兩方○而謚西畫謚盡今据新書志改

今測角在赤道南二度云云。○梅文鼎曰一行所測去極度與舊不同者自牽牛至東井十四宿去極之度皆古測大而唐測小是其星自南而北也。自輿鬼至南斗十四宿去極之度皆古測小而唐測大是其星自北而南也。向使非恒星移動何以在冬至後者漸北在夏至後者漸南乎。臣召南按自古皆謂恒星隨

天不移西法始謂恒星天亦是移動其說甚確然一行以銅儀測驗即知古今不符已開西法之先矣

須女四星十二度舊去極百度今一百一度。

臣台南

按舊本於虛星上脫此文十七字又昴星上脫胃三星十四度六字是二十八宿中少二宿也今据新書補

為朱鳥嗉○嗉譌味此言張宿不言柳宿也今改正

以覆矩斜視北極○舊本作以復短誤也今据新志改其夕常明然則骨利幹猶在其南矣○舊本脫常明下

九字今補

浸成微分之差其差不已遂與銜錯○舊本失其差二字不成句法今補

假今學者因二十里之高以立句股之術○臣德潛按

新志此文尚有登岱一事故云二十里之高謂自山麓至嶽頂二十里也此處應脫一段

蔡州上蔡縣武津館北極高三十三度八分○小注末舊本脫夏至影在表北一尺三寸六分半十三字照新書補入





舊唐書卷三十五考證

欽定四庫全書

舊唐書卷三十六

後晉司空同中書門下平章事劉 昫撰

志第十六

天文下

天文之為十二次所以辨析天體紀綱辰象上以考七曜之宿度下以配萬方之分野仰觀變謫而驗之於郡國也傳曰歲在星紀而淫于玄枵姜氏任氏實守其地

及七國交爭善星者有甘德石申更配十二分野故有  
周秦齊楚韓趙燕魏宋衛魯鄭吳越等圖張衡蔡邕又  
以漢郡配焉自此因循但守其舊文無所變革且懸象  
在上終天不易而郡國沿革名稱屢遷遂令後學難為  
憑準貞觀中李淳風撰法象志始以唐之州縣配焉至  
開元初沙門一行又增損其書更為詳密既事包今古  
與舊有異同頗裨後學故錄其文著于篇并配武德以  
來交蝕淺深及注蝕不虧以紀日月之變云爾

須女虛危玄枵之次子初起女五度

二千三百七十四分秒四少

中

虛九度終危十二度其分野自濟北郡東踰濟水涉平

陰至于山荏

漢太山郡荏縣屬齊州西南之界

東南及高密

漢高密國今在密州

北界自此以上玄枵之分

東盡東萊之地

漢之東萊即古膠萊國今為萊州登州也

又得

漢之北海千乘淄川濟南齊郡

今為淄青齊等州及濟州東界

及平原

渤海盡九河故道之南濱于碣石

今為德州棣州滄州其北界

自九

河故道之北屬析木分也

營室東壁陬訾之次亥初起危十三度

二千九百二十六分太

中

室十二度

五百五十分秒二十一

終奎一度其分野自王屋太行

而東盡漢河內之地

今為懷州治衛州之西境

北負漳鄴東及館陶

聊城

漢地自黎陽內黃及鄴魏武安東至館陶元城皆屬魏郡自頓丘三城武陽東至聊城皆屬東郡今

為相魏衛州

東盡漢東郡之地

漢東郡清河西南至白馬濮陽東至東河須昌濱濟至于

鄆城今為滑州濮州鄆州

其須昌濟東之地屬降婁非豕韋也

奎婁及胃降婁之次戌初起奎二度

一千二百一十七分秒十七少中

婁一度

一千八百八十三

終胃三度其分野南屆鉅野東達梁

父以負東海又東至于呂梁乃東南抵淮水而東盡于

徐夷之地

東為降婁之次

得漢東平魯國

漢東平國在任城平陸今在兗州

奎

為大澤在陬訾之下流濱于淮泗東北負山為婁胃之墟蓋中國膏腴之地百穀之所阜也胃星得馬牧之氣與冀之北土同占

胃昴畢大梁之次酉初起胃四度

二千五百四十度九分秒八太

中昴

六度

一百七十度四分半

終畢九度其分野自魏郡濁漳之北得

漢之趙國廣平鉅鹿常山東及清河信都北據中山真

定

今為洺趙邢恒定冀貝深八州又分相魏博之北界與瀛州之西全趙之分

又北盡漢代

郡鴈門雲中定襄之地與北方群狄之國皆大梁分也

觚觶參伐實沉之次也申初起畢十度

八百四十一分十五太

中

參七度

一千五百二十六

終井十二度其分野得漢河東郡

今為

蒲絳晉州又得澤州及慈州界也

及上黨

今為澤潞儀沁也

太原

今為并汾州

盡西

河之地

今為隰州石州嵐州西涉河得銀州以北也

又西河戎狄之國皆實

沉分也

今河東郡永樂芮城河北縣及河曲豐勝夏州皆為實沉之次東井之分也

參伐為

戎索為武政故殷河東盡大夏之墟上黨次居下流與

趙魏相接為觚觶之分



東井輿鬼鶉首之次也未初起井十二度

二千一百七十二秒十五

太

中井二十七度

二千八百二十八分秒一半

終柳六度其分野自

漢之三輔及北地上郡安定西自隴坻至河西西南盡

巴蜀漢中之地及西南夷犍為越嶲益州郡極南河之

表東至牂柯皆鶉首分也

鶉首之分得禹貢雍梁二州其郡縣易知故不詳載

狼

星分野在江河上源之西弧矢犬雞皆徼外之象

今之西羌

吐蕃吐谷渾及西南徼外夷皆狼星之象

柳星張鶉火之次午初起柳七度

四百六十四秒七少

中七星七

度一千一百三終張十四度其分野北自滎澤滎陽並京索

暨山南得新鄭密縣至於方陽

方陽之南得漢之潁川郡翟崇高郊城襄城南

盡鄴縣今為鄧汝唐仙四州界又漢南陽郡北自宛葉南盡漢東申隨之地大抵以淮源桐栢東陽為限今之

唐州隨州屬鶉火申州屬壽星又自洛邑負河之南西及函谷南紀達

武當漢水之陰盡弘農郡

漢弘農盧氏陝縣今為虢陝二州上洛商洛為商州丹水

為均州宜陽通池新安陸渾今屬洛州

古成周號鄭管鄆東號密滑焦唐隨

申皆鶉火分也及祝融氏之都

新鄭為祝融氏之墟屬鶉火其東鄆則入壽星

舊說皆在函谷非也柳星與鬼之東又接漢源故殷商洛之陽接

南河之上流七星上係軒轅得土行之正位中岳象也故為河南之分張星直河南漢東與鶉尾同占

翼軫鶉尾之次已初起張十五度一千七百九十中翼五秒二十二少

十二度二千四百六十一秒八半終軫九度其分野自房陵白帝而

東盡漢之南郡南郡巫縣今在蘄州秭歸在歸州夷陵在峽州褒夔郢申在襄郢界餘為荊州

江夏江夏竟陵今為復州安鄂縣沔黃五州皆漢江夏界東達廬江南郡漢廬江之尋陽

今在江州於山河之像宜屬鶉尾也濱彭蠡之西得漢長沙武陵桂陽零

陵郡零陵今為道州永州桂陽今為柳州大抵自沅湘上流西通黔安之左皆楚之分也又逾南

紀盡鬱林合浦之地

鬱林縣今在貴州定林縣今在廉州合浦縣今為桂州今自富昭蒙

龔繡容白罕八州以西皆屬鶉尾之墟也

荆楚鄖郢羅權巴夔與南方蠻貊

殷河南之南其中一星主長沙國逾嶺徼而南皆甌東

青丘之分

今安南諸州在雲漢上源之東宜屬鶉火

角亢壽星之次辰初起軫十度

八十七秒十四半

中角八度

七

五十秒三十

終氐一度其分野自原武管城濱河濟之南東

至封丘陳留盡陳蔡汝南之地逾淮源至于弋陽

漢陳留郡

自封丘陳留已東皆入大火之分漢汝南今為豫州西華南頓項縣今為陳州汝陰縣今在潁州弋陽縣在光

州

西涉南陽郡至于桐栢又東北抵嵩之東陽

漢南陽郡春陵

湖陽蔡陽後分為春陵郡後魏以為南荊州今有舊義陽郡在中國之東界今為申州按中國地絡在南北河之間故申隨光三州皆屬禹貢豫州之分宜屬鷄火壽星非南方負海之地古陳蔡隨許皆

屬壽星分也氐星涉壽星之次故其分野殷維邑衆山

之東與亳土相接

氐房心大火之次也卯初起氐二度

一千四百一十九分秒五太

中

房二度

二千八百五十分秒一半

終心六度其分野得漢之陳留縣

自雍丘襄邑小黃而東循濟陰界于齊魯右泗水達於

呂梁乃東南抵淮西南接太昊之墟盡濟陰山陽楚國

豐沛之地

濟陰縣之定陶寬句乘氏今在東郡大抵曹宋徐亳及鄆州西界皆屬大火分

自商

亳以負北河陽氣之所升也為心分自豐沛以負南河陽氣之所布也為房分故其下流皆與尾星同占西接陳鄭為氐星之分

尾箕析木之次也寅初起尾七度

二千七百五十分秒二十一少

中箕

星五度

三百七十分秒六十七

終斗八度其分野自渤海九河之北

盡河間涿郡廣陽國

漢渤海郡浮陽今為清池縣屬滄州涿郡之饒陽今屬瀛州涿縣良

鄉與廣陽國薊縣今在幽州

及上谷漁陽右北平遼東樂浪玄菟

漁陽

在幽州右北平在白狼無終縣隋代為漁陽郡古孤竹國後置北平郡今為平州遼東在無慮縣即周禮暨無閭山樂浪在朝鮮縣玄菟在高句驪縣今皆在東夷也

古之北燕孤竹無終及東

方九夷之國皆析木之分也尾得雲漢之末流北紀之所窮也箕與南斗相近故其分野在吳越之東

南斗牽牛星紀之次也丑初起斗九度

一千四十二分秒十二太中

斗二十四度

一千一百分秒八半

終女四度其分野自廬江九江

負淮水之南盡臨淮廣陵至于東海

廬壽和濠揚皆屬星紀也

又逾

南河得漢丹陽會稽豫章郡西濱彭蠡中涉越州盡蒼

梧南海

又逾嶺表自韶廣封梧藤羅雷州南及珠崖自北以東為星紀其西皆屬鶉尾之次

古吳

越及東南百越之國皆星紀分也南斗在雲漢之下流

當淮海之間為吳分牽牛去南河寢遠故其分野自豫

章東達會稽南逾嶺為越分島夷蠻貊之人聲教之所

不洎皆係于狗國

李淳風刊定隋大志圖頗為詳悉所注郡邑多依用其後州縣又隸管屬

不同但據山河以分耳

災異



武德元年十月壬申朔四年八月丙戌朔六年十二月  
壬寅朔九年十月丙辰朔貞觀元年閏三月癸丑朔九  
月庚戌朔二年三月戊申朔三年八月己巳朔四年閏  
正月丁卯朔六年正月乙卯朔九年閏四月丙寅朔十  
一年三月丙戌朔十二年閏二月庚辰朔十三年八月  
辛未朔十七年六月己卯朔十八年十月辛丑朔二十  
年閏三月癸巳朔二十二年八月己酉朔高宗顯慶五  
年六月庚午朔乾封二年八月己酉朔總章二年六月

戊申朔咸亨元年六月壬寅朔二年十一月甲午朔三年十一月戊子朔上元元年三月辛亥朔二年九月壬寅朔調露二年四月乙巳朔十一月壬寅朔開耀元年十月丙寅朔永淳元年四月甲子朔十一月庚申朔則天垂拱二年二月辛未朔四年六月丁亥朔天授二年四月壬寅朔如意元年四月丙申朔長壽元年九月丁亥朔三年九月壬午朔延載元年九月壬午朔證聖元年二月己酉朔聖歷三年五月乙酉朔久視元年五月

巳酉朔長安二年九月乙丑朔三年三月壬戌朔九月  
庚寅朔中宗神龍三年六月丁卯朔景龍元年十二月  
乙丑朔睿宗太極元年二月丁卯朔玄宗先天元年九  
月丁卯朔開元三年七月庚辰朔六年五月乙丑朔九  
年五月乙巳朔十二年閏十二月壬辰朔十七年十月  
丙午朔二十年二月癸酉朔八月辛未朔二十一年七  
月乙丑朔二十二年十二月戊子朔二十三年閏十一  
月壬午朔二十六年九月丙申朔二十八年三月丁亥

朔天寶元年七月癸卯朔五載五月壬子朔十三載六月乙丑朔肅宗至德元載十月辛巳朔上元二年七月癸未朔蝕既大星皆見代宗大歷三年三月乙巳朔四年正月十五日甲午蝕十三年甲戌有司奏合蝕不蝕十四年二月丙寅朔德宗貞元二年八月辛巳朔日蝕有司奏准禮請伐鼓于社不許太常卿董晉諫曰伐鼓所以責羣陰助陽德宜從經義竟不報六年正月戊戌朔有司奏合蝕不蝕百寮稱賀七年六月庚寅朔有司

奏蝕是夜陰雲不見百官表賀八年十一月壬子朔先是司天監徐承嗣奏據厯合蝕八分今退蝕三分准占君盛明則陰匿而潛退請書于史從之十年四月癸卯朔有司奏太陽合虧已正後刻蝕之既未正後五刻復滿太常奏准禮上不視朝其日陰雲不見百官表賀十七年五月壬戌蝕元和三年七月癸巳蝕憲宗謂宰臣曰昨司天奏太陽虧蝕皆如其言何也又素服救日其儀安在李吉甫對曰日月運行遲速不齊日凡周天三

百六十五度有餘日行一度月行十三度有餘率二十  
九日半而與日會又月行有南北九道之異或進或退  
若晦朔之交又南北同道即日為月之所掩故名薄蝕  
雖自然常數可以推步然日為陽精人君之象若君行  
有緩有急即日為之遲速稍踰常度為月所掩即陰侵  
於陽亦猶人君行或失中應感所致故禮云男教不脩  
陽事不得謫見于天日為之蝕古者日蝕則天子素服  
而脩六官之職月蝕則后素服而脩六官之職皆所以

懼天戒而自省惕也人君在民物之上易為驕盈故聖  
人制禮務乾恭兢惕以奉若天道苟德大備天人合應  
百福斯臻陛下恭已向明日慎一日又顧憂天譴則聖  
德益固升平何遠伏望長保睿志以永無疆之休上曰  
天人交感妖祥應德蓋如卿言素服救日自貶之旨也  
朕雖不德敢忘兢惕卿等當匡吾不迨也十年八月己  
亥朔十三年六月癸丑朔長慶二年四月辛酉朔三年  
九月壬子朔太和八年二月壬午朔開成二年庚寅朔

當蝕陰雲不見會昌三年二月庚申朔四年二月甲寅朔五年二月丙午朔六年十二月戊辰朔皆蝕

武德九年二月二十三日夜星孛于胃昴間凡二十八日又孛于卷舌貞觀八年八月二十三日星孛于虛危歷于玄枵凡十一日而滅太宗謂侍臣曰是何妖也虞世南對曰齊景公時有彗星晏子對曰公穿池畏不深築臺恐不高行刑恐不重是以彗為誡耳景公懼而脩德十六日而星滅臣聞若德政不脩麟鳳數見無所補



也苟政教無闕雖有災愆何損於時伏願陛下勿以功  
高古人而務大勿以太平日久而驕逸慎終如始彗何  
足憂帝深嘉之十三年三月二十二日夜星孛于畢昴  
十五年六月十九日星孛於太微犯郎位七月甲戌滅  
總章元年四月彗見五車上避正殿減膳令內外五品  
已上上封事極言得失許敬宗曰星雖孛而光芒小此  
非國青不足上勞聖慮請御正殿復常膳不從敬宗又  
進曰星孛于東北王師問罪高麗將滅之帝曰我為萬

國主豈移過於小蕃哉二十二日星滅上元二年十月  
彗見于角亢南長五尺三年七月二十一日彗見東井  
指南河積薪長三尺餘漸向東北光芒益長三丈掃  
中台指文昌經五十八日而滅永隆二年九月一日萬  
年縣女子劉凝靜乘白馬著白衣男子從者八九十人  
入太史局升令廳牀坐勘問此有何災異太史令姚玄  
辯執之以聞是夜彗見西方天市中五尺漸小向東長  
行出天市至河鼓右旗十七日滅永淳二年三月十八

日彗見五車之北凡二十五日而滅文明元年七月二十  
二日西方有彗長丈餘凡四十九日滅光宅元年九  
月二十九日有星如半月見西方景龍元年十月十八  
日彗見西方凡四十三日而滅二年二月天狗墜于西  
南有聲如雷野雉皆雊七月七日星孛胃昂之間三年  
八月八日星孛于紫宮太極元年七月四日彗入太微  
開元十八年六月十一日彗見五車三十日星孛于畢  
昴二十六年三月八日星孛于紫微垣歷斗魁十餘日

陰雲不見

武德元年六月三日熒惑犯左執法八年九月二十二日熒惑入太微九年五月傅奕奏太白晝見于秦秦國當有天下高祖以狀授太宗及太宗即位召奕謂曰汝前奏事幾累我然而今後但須悉心盡言無以前事為慮貞觀十三年五月熒惑犯右執法十五年二月十五日熒惑逆犯太微東藩上相十七年三月七日熒惑守心前星十九日退其月二十二日熒惑犯句陳九月二

十九日熒惑犯太微西藩上將十九年九月二十四日  
太白在太微犯左執法光芒相及永徽三年六月二日  
熒惑犯右執法三日太白入太微犯右執法顯慶五年  
二月三日熒惑入南斗龍朔元年九月十四日太白犯  
太微左執法乾封二年五月熒惑入軒轅咸亨元年十  
二月熒惑入太微上元二年正月九日熒惑犯房星儀  
鳳四年四月九日熒惑犯羽林調露二年五月二十四  
日太白經天長安四年熒惑入月及鎮星犯天關太史

令嚴善思奏法有亂臣伏罪臣下謀上之變歲餘誅二  
張五王立中宗景龍二年六月八日太白晝見于東井  
景龍三年三月二十七日太白入羽林太極元年三月  
三日熒惑入東井四月十二日熒惑與太白守東井先  
天元年八月十四日夜月蝕盡有星入月魄中十六日  
太白襲月開元十年七月二十九日熒惑入南斗天寶  
十三載五月熒惑守心五十餘日至德元年十一月二  
十六日熒惑太白同犯昴

武德二年三月二十七日太白辰鎮聚于東井九年六月十八日辰歲會于東井二十三日辰歲太白又會于東井貞觀十八年五月太白辰合于東井景雲二年七月太白鎮同在張宿

武德三年十月三十日有流星墜於東都城內殷殷有聲高祖謂侍臣曰此何祥也起居舍人令狐德棻曰昔司馬懿伐遼有流星墜于遼東梁水上尋而公孫淵敗走晉軍追之至其星墜處斬之此王世充滅亡之兆也

貞觀十八年五月有流星大如斗五日出東壁光照聲如雷咸亨三年二月三日有流星如雷景龍二年二月十九日大星墜于西南聲如雷野雉皆雊景雲二年八月十七日東方有流星出五車至于上台天寶三載閏二月十七日星墜于東南有聲京師訛言官遣張振捕人肝以祭天狗人相恐畿內尤甚景龍元年九月十八日有赤氣竟天其光燭地經三日乃止九月四日黃霧昏濁唐隆元年六月八日虹蜺竟天



至德元年三月乙酉歲太白熒惑合于東井十月辛丑朔日有食之十一月壬戌五更有流星大如斗流于東北長數丈蛇行屈曲有碎光迸空乾元元年四月熒惑鎮太白合於營室太史南宮沛奏所合之處戰不勝大人惡之恐有喪禍明年冬郭子儀等九節度之師自潰於相州五月癸未夜一更三籌月掩心前星二更四籌方出正月癸丑月入南斗魁二年二月丙辰月犯心前大星相去三寸三年四月丁巳夜五更彗出東方色白

長四尺在婁胃間疾行向東北角歷昴畢觜參井鬼柳  
軒轅至太微左執法七寸所凡五十餘日方滅閏四月  
辛酉朔妖星見于南方長數丈是時自四月初大霧大  
雨至閏四月末方止是月逆賊史思明再陷東都米價  
踊貴斗至八百文人相食殍尸蔽地上元元年十二月  
癸未夜歲掩房星二年七月癸未朔日有蝕之大星皆  
見司天秋官正瞿曇謨奏曰癸未太陽虧辰正後六刻  
起虧已正後一刻既午前一刻復滿虧於張四度周之

分野甘德云日從己至午蝕為周周為河南今逆賊史  
思明據乙己占曰日蝕之下有破國其年九月制去上  
元之號單稱元年月首去正二三之次以建冠之其年  
建子月癸巳亥時一鼓二籌後月掩昴出其北兼白暈  
畢星有白氣從北來貫昴司天監韓穎奏曰按石申占  
月掩昴胡王死又月行昴北天下福臣伏以三光垂象  
月為刑殺之徵二石殲夷史官常占畢昴為天綱白氣  
兵喪掩其星則大破胡王行其北則天下有福巳為周

分癸主幽燕當羯胡竊據之郊是殘寇滅亡之地明年

史思明為其子朝義所殺十月雍王收復東都上元三

年正月

時去上元之號  
今存之以正年

建辰月肅宗病是月丙戌月有

黃白冠連成暈東井五諸侯南北河輿鬼皆在中建巳

月以楚州獻定國寶乃改元寶應月復以正二三為次

其月肅宗崩代宗即位其月壬子夜西北方有赤光見

炎赫亘天貫紫微漸流于東瀰漫北方照耀數十里久

之乃散辛未夜江陵見赤光貫北斗俄僕固懷恩叛明

年十月吐蕃陷長安代宗避狄幸陝州廣德二年五月  
丁酉朔日當蝕不蝕羣臣賀十二月三日夜星流如雨  
自亥及曉永泰元年九月辛卯太白經天是月吐蕃逼  
京畿二年六月丁未日重輪其夜月重輪是年大水大  
歷元年十二月彗星出匏瓜長尺餘犯宦者星二年七  
月癸亥熒惑色赤黃順行入氐乙丑夜鎮星色黃近辰  
星在東井初度丙寅申時有青赤氣長四十餘尺見日  
旁久之乃散己巳夜歲星順行去司怪七寸庚午夜月

通天關壬申十二月赤氣長二大亘日上甲戌酉時白  
氣亘天八月壬午月入氐戌子月犯牽牛相去九寸巳  
丑夜月犯畢相去四寸九月戊申朔歲星守東井凡七  
日乙卯吐蕃入寇至邠寧戊午夜白霧起尾西北瀰漫  
亘天乙丑晝有流星大如一升器其色黃明尾迹長六  
七十尺出于午流于丑戌辰夜熒惑去南斗五寸乙亥  
青赤氣亘于日旁十一月辛酉夜月去東井一尺甲子  
夜月去軒轅一尺壬戌京師地震有聲如雷自東北來

十二月丁酉夜熒惑入壁壘戊戌有黑氣如霧亘北方  
久之方散三年正月壬子夜月掩畢丁巳巳時日有黃  
冠青赤珥三月乙巳朔日有蝕之自午虧至後一刻凡  
蝕十分之六分半癸丑夜太白去天衢八寸癸酉夜太  
白順行去歲星二尺七月壬申夜五星並列東方占云  
中國之利八月巳酉月入畢辛酉月入東井壬戌火星  
去太白四寸庚午夜太白犯左執法相去一尺九月壬  
申夜歲星入輿鬼乙亥夜大星如斗自南流北其光燭

地丁丑夜熒惑入太微垣巳卯夜太微犯左執法相去  
六寸戊子夜歲星去輿鬼一尺巳丑夜月犯東井去五  
寸庚戌熒惑去太微五寸太白去進賢四十癸巳月去  
靈臺一尺四年正月十五日有蝕之二月丙午夜熒  
惑有芒角去房星二尺所丙辰夜地震有聲如雷者三  
三月壬午熒惑有芒角入氐癸未月去氐一尺戊子夜  
鎮星近輿鬼五月丙戌京師地震七月熒惑犯次相星  
九月丁卯熒惑犯郎位是歲自四月霖雨至秋末方息



京師米斗八百文五年四月乙巳夜歲星入軒轅巳未  
夜彗出五車蓬孛光芒長三丈巳卯夜彗出北方其色  
白癸未夜彗隨天東行近八穀甲申西北方白氣竟天  
六月丙申月去太微左執法一寸丁酉月去哭星二寸  
庚子月去氐七寸癸卯彗去三公二尺庚戌太白入東  
井甲寅白氣出西北方竟天巳未彗星滅七月京師米  
價騰踊斗千錢六年七月乙巳夜月掩畢入昂畢中壬  
子月去太微二寸八月庚辰月入太微九月壬辰熒惑

犯哭星去二寸庚子夜火去泣星四寸月掩畢甲辰夜  
西南流星大如一升器有尾跡光明照地珠子散落長  
五丈餘出須女入天市南垣滅丁未月入太微辛亥熒  
惑入壁壘十月丁卯月掩畢甲戌月入軒轅十一月壬  
寅月入太微丙午夜月掩氐十一月己巳月入太微七  
年正月乙未夜月近軒轅二月戊午月掩天關辛酉月  
逼輿鬼己巳熒惑逼天街三月辛卯月逼靈臺丁巳熒  
惑入東井辛未歲星入東角壬申月入羽林丙子鎮星

臨太微五月丙戌月入太微六月乙亥月臨東井十二  
月甲子太白入羽林丙寅雨土是夜長星出于參八年  
五月庚辰熒惑入羽林六月戊辰流星大如一升器有  
尾跡長三丈流入太微七月己卯太白入東井留七日  
而出庚寅酉時有氣三道竟天辛卯熒惑臨月乙未月  
掩畢中八月戊午夜熒惑臨月其月朱滔自幽州入朝  
九月癸未月入羽林己丑月入太微十月癸卯太白臨  
鎮星丙午夜太白臨進賢丁巳夜月掩畢壬戌夜月入

鬼中庚午月近太白並入氐中十一月己卯月入羽林  
壬午鎮星逼進賢癸未太白掩房癸巳月入太微垣閏  
十一月壬寅夜太白辰星會于危癸丑月掩天關甲寅  
月入東井乙丑月掩天關丙寅月入氐十二月癸酉月  
入羽林九年正月癸丑熒惑逼諸王星三月丁未熒惑  
入東井四月乙亥月臨軒轅丁丑月入太微五月己酉  
太白逼熒惑乙未夜太白入軒轅辛酉辰星逼軒轅六  
月戊寅月逼天綱己卯月掩南斗庚辰月入太微戊子

太白臨左執法七月甲辰月掩房辛亥月入羽林壬戌  
月入輿鬼八月辛卯月掩軒轅九月庚子朱泚自幽州  
入朝是月太白入南斗甲子熒惑入氐十月戊子木入  
南斗十二月戊辰月入羽林十年正月昭義軍亂逐薛  
平田承嗣據河北叛戊申月逼軒轅甲寅夜熒惑歲星  
合于南斗並順行二月河陽軍亂逐常休明三月陝州  
軍亂逐李國青庚戌熒惑入壁壘四月甲子熒惑順行  
入羽林庚午月臨軒轅六月癸亥太白臨東井乙丑夜

熒惑臨天困戊辰月入太微乙亥月臨南斗七月庚子  
辰星太白順行同在柳八月乙酉熒惑順行臨天高戊  
子月入太微九月甲午月臨房十月辛酉朔日有蝕之  
十二月甲子夜東方月上有白氣十餘道如匹帛貫五  
車東井輿鬼觜參畢柳軒轅三更後方散十二年閏八  
月丁酉太白晝見其年七月李靈耀以汴州叛十月方  
誅之十三年正月乙丑夜月掩軒轅癸酉夜月掩心前  
星丙子月入南斗魁中二月乙未鎮星入氐辛亥夜流

星大如桃尾長十丈出匏瓜入太微三月壬戌月入太  
微戊辰月逼心星是月幸臣元載誅王縉黜四月庚寅  
月臨左執法乙未夜月掩心前星五月丙辰月入太微  
六月戊戌月入羽林七月庚戌月入南斗癸丑熒惑逼  
司怪巳巳宰相楊綰卒乙亥熒惑順行入東井是歲春  
夏旱八月大雨河南大水平地深五尺吐蕃入寇至坊  
州十月巳丑月臨歲星壬辰月掩昴乙未月臨五諸侯  
庚子月臨左執法遂入太微垣十一月癸丑太白臨哭

星乙卯夜月入羽林戊辰月臨左執法十二月辛巳鎮  
星臨關鍵壬午月入羽林十四年五月十一日代宗崩  
德宗即位明年改元建中至四年十月朱泚亂車駕辛  
奉天貞元四年五月丁卯月犯歲星乙亥熒惑鎮歲聚  
于營室三十餘日八月辛卯朔日有蝕之十年三月乙  
亥黃霧四塞日無光四月太白晝見元和七年正月辛  
未月掩熒惑六月乙亥月去南斗魁第四星西北五寸  
所八年七月四日夜月去太微東垣之南首星南一尺



所癸酉夜月去五諸侯之西第四星南七寸所十月巳  
丑熒惑順行去太微西垣之南首星西北四寸所九年  
二月丁酉月去心大星東北七寸所四月辛巳北方有  
大流星跡尾長五丈光芒照地至右攝提南三尺所九  
月巳丑月掩軒轅十二年正月戊子彗出畢南長二尺  
餘指西南凡三日近參旗没十三年正月乙未歲星退  
行近太微西垣之南第一星八月巳未月近南斗魁壬  
戌太白順行近太微十四年正月巳丑月近東井北轅

星癸卯夜月近南斗魁星五月庚寅月犯心前大星西南一尺所十五年正月二十七日憲宗崩穆宗即位七月庚申熒惑退行入羽林癸亥夜大星出勾陳南流至婁北滅八月己卯月掩牽牛長慶元年正月丙午月掩鉞星二更後月去東井南轅第一星南七寸丙辰南方大流星色赤尾有跡長三丈光明燭地出狼星北二尺所東北流至七星三尺所滅己未夜星孛于翼丁卯夜星孛在辰上去太微西垣南第一星七寸所二月八日

夜太白犯昴東南五寸所丁亥夜月犯歲星南六寸所  
在尾十三度三月庚戌太白犯五車東南七寸所七月  
壬寅月掩房次相星乙丑夜東方大流星色黃有尾跡  
長六七丈光明燭地出參西北向西流至羽林東北滅  
其月幽州軍亂囚其帥張弘靖立朱克融其月二十八  
日鎮州軍亂殺其帥田弘正王廷湊元和末河北三鎮  
皆以疆土歸朝廷至是幽州俱失俄而史憲誠以魏州  
叛三鎮復為盜據連兵不息八月辛巳夜東北有大星

自雲中出流白光照地前後長丈二尺五寸西北入蜀  
滅太白在軒轅左角西北一尺所是月壬辰夜太白去  
太微垣南第一星一尺所九月戊戌夜太白順行入太  
微去左執法星西北一尺所乙巳夜去左執法二寸所  
辛亥月去天關西北八寸二年正月戊申魏帥田布伏  
劍死史憲誠據郡叛二月甲戌夜熒惑在歲星南七寸  
所四月辛酉朔日有蝕之在胃十二度不盡者四之一  
燕趙見之既七月丙子夜東方大星西流至昴滅其聲

如雷十月甲子夜月掩牽牛中星乙丑夜太白去南斗  
魁第四星西一寸所十一月丁丑月掩左角庚辰月去  
房一尺所十二月丁亥月掩左角庚戌夜月近房星壬  
子五更後月近太白相去一尺所四年正月二十二日  
穆宗崩敬宗即位二月癸卯太白犯東井近北轅三月  
甲子熒惑犯鎮星壬申太白犯東井近北轅四月十七  
日染院作人張韶於柴草車中載兵器犯銀臺門共三  
十七人入大內對食於清思殿其日禁兵誅之七月乙

卯夜有大星出于天船流犯斗魁第一星西南滅八月  
丁亥熒惑犯鎮星癸未熒惑入東井己丑太白犯軒轅  
右角十二月戊子夜月掩東井甲午夜西北有流星出  
閣道至北極滅寶曆元年七月乙酉月犯西咸去八寸  
所甲子夜月掩畢閏七月癸巳夜月去心距九寸庚子  
流星去北極至南斗柄滅八月乙卯太白犯房相去九  
寸九月癸未太白犯南斗丙戌月犯畢甲午月犯太微  
左執法十月辛卯月犯天囷相去七寸癸亥太白臨哭

星相去九寸十一月庚辰鎮星犯東井相去七寸癸未  
夜月去東井六寸戊戌西南大流星出羽林入濁十二  
月戊申夜月犯畢乙酉夜西北方有霧起須臾徧天霧  
上有赤氣其色或深或淺久而方散二年正月甲戌夜  
北方大流星長五丈餘出紫微過軫滅甲申月犯右執  
法相去五寸二月丙午夜月犯畢三月己巳流星出河  
鼓東過天市入濁滅四月甲子夜西方大流星長三丈  
穿天市垣至房星滅其月十七日白虹貫日連環至午

方滅五月甲戌月去太微八寸所癸巳西北方大流星  
長三丈光明照地入天市垣中滅甲午五更熒惑犯昴  
六月庚申太白犯昴七月壬申流星長二丈出斗北入  
濁滅其夜月初入巳上有流星向南滅其夜辰犯畢八  
月丙申夜北方大流星長四丈餘出王良流至北斗柄  
滅甲辰夜太白去太微八寸所丁未夜熒惑近鎮星西  
北丁丑熒惑去輿鬼七寸十二月八日夜敬宗為內官  
劉克明所弑立絳王樞密使王守澄等殺絳王立文宗



太和元年九月戊寅月掩東井南轅星四年四月辛酉  
夜四更五籌後月掩南斗第二星十一月辛未朔熒惑  
犯右執法西北五寸五年二月宰相宋申錫漳王被誣  
得罪八年二月朔日有蝕之六月辛巳五更有六流星  
赤色有尾跡光明照地球子散落下河鼓北流近天棓  
滅有聲如雷七月己巳夜流星出紫微西北長二丈至  
北斗第一星滅是夜五更月犯昴九月辛亥夜五更太  
微宮近郎位有彗星長丈餘西指西北行凡九夜越郎

位星西北五尺滅癸丑月入南斗庚申右軍中尉王守澄宣召鄭注對於浴殿門是夜彗星出東方長三尺芒耀甚猛十二月丙戌夜月掩昴九年三月乙卯京師地震四月辛丑大風震雷拔殿前古樹六月庚寅夜月掩歲星丁酉夜一更至四更流星縱橫旁午約二十餘處多近天漢其年十一月李訓謀殺內官事敗中尉仇士良殺王涯鄭注李訓等十七家朝臣多有貶逐開成元年正月甲辰太白掩西建第一星其月十五日有蝕

之二月乙亥夜四更京師地震二年丙午夜彗出東方  
長七尺餘在危初度西指戊申夜危之西南彗長七尺  
芒耀愈猛亦西指癸丑夜彗在危八度庚申夜在虛三  
度半辛酉夜彗長丈餘直行稍南指在虛一度半壬戌  
夜彗長二丈其廣三尺在女九度癸亥夜彗愈長廣在  
女四度三月甲子朔其夜彗長五丈岐分兩尾其一指  
氐其一掩月在斗十度丙寅夜彗長六丈尾無岐北指  
在危七度文宗召司天監朱子容問星變之由子容曰

彗主兵旱或破四夷古之占書也然天道懸遠唯陛下  
脩政以抗之乃勅尚食今後每日御食料分為十日其  
夜彗長五丈濶五尺却西北行東指戊辰夜彗長八丈  
有餘西北行東指在張十四度詔天下放繫囚撤樂減  
膳避正殿先是群臣拜章上徽號宜並停癸未夜彗長  
三尺出軒轅之右東指在張七度六月河陽軍亂逐李  
詠是歲夏蝗大旱八月丁酉彗出虛危之間十月地南  
北震三年十月十九日彗見長二丈餘二十日夜長二

丈五尺二十一日夜長三丈二十二日夜長三丈五尺  
並在辰上西指軫魁十一月乙卯朔是夜彗出東方東  
西竟天五月五日太白犯輿鬼六月一日太白犯熒惑  
二十八日太白犯右執法十月七日太白犯南斗四年  
正月丁巳熒惑太白辰聚于南斗癸酉彗出于西方在  
室十四度閏月二十三日又見于卷舌北凡三十三日  
至二十六日夜滅二月二十六日自夜四更至五更四  
方中央流星大小二百餘並西流有尾跡長二丈三月

乙酉夜月掩東井第三星是歲夏大旱禱祈無應文宗憂形于色宰臣進曰星官言天時當爾乞不過勞聖慮帝改容言曰朕為人主無德庇人比年災旱星文謫見若三日內不雨朕當退歸南內卿等自選賢明之君以安天下宰相楊嗣復等嗚咽流涕不已七月辛丑月犯熒惑河南大水八月辛未流星出羽林有尾跡長十丈有聲如雷十月辛酉辰入南斗魁五年正月文宗崩武宗即位會昌元年六月二十九日從一鼓至五鼓小流

星五十餘交橫流散七月二日北方流星光明照地東  
北流星有聲如雷九月癸巳熒惑犯輿鬼閏九月丁酉  
熒惑貫鬼宿戊戌在鬼中十一月六日彗見西南在室  
初度凡五十六日而滅其夜上方大流星光明燭地東  
北流星有聲二年六月乙丑熒惑犯歲星丙寅太白犯  
東井其夜熒惑舍赤色動搖於井中至八月十六日犯  
輿鬼五年二月五日太白掩昴北側在昴宿一度五月  
辛酉太白入畢口距星東南一尺八月七日太白犯軒

韓大星

舊儀太史局隸秘書省掌視天文歷象則天朝術士尚獻輔精於歷算召拜太史令獻輔辭曰臣山野之人性靈散率不能屈事官長天后惜其才久視元年五月十九日勅太史局不隸秘書省自為職局仍改為渾天監至七月六日又改為渾儀監長安二年八月獻輔卒復為太史局隸秘書省緣進所置官員並廢景龍二年六月改為太史監不隸秘書省景雲元年七月復為太史



局隸秘書省八月又改為太史監十一月又改為太史局二年閏九月改為渾儀監開元二年二月改為太史監十五年正月改為太史局隸秘書省天寶元年又改為太史監乾元元年三月改太史監為司天臺於永寧坊張守珪故宅置勅曰建邦設都必稽玄象分列曹局皆應物宜靈臺三星主觀察雲物天文正位在太微西南今興慶宮上帝廷也考符之所合置靈臺宜令所司量事修理

舊臺在秘書省之南

仍置五官正五人司天臺內別置

一院曰通玄院應有術藝之士徵辟至京于崇玄院安置其官員大監一員正三品少監二人正四品丞三人正六品主簿三人主事二人五官正五人五官副正五人靈臺郎一人五官保章正五人五官挈壺正五人五官司厯五人五官司辰十五人觀生厯生七百二十六人凡官員六十六人寶應元年司天少監瞿曇謨奏曰司天丞請減兩員主簿減兩員主事減一員保章正減三員挈壺正減三員監候減兩員司辰減七員五陵司

辰減五員從之天寶十三載三月十四日勅太史監官  
除朔望朝外非別有公事一切不須入朝及充保識仍  
不在點檢之限開成五年十二月勅司天臺占候災祥  
理宜秘密如聞近日監司官吏及所由等多與朝官并  
雜色人交游既乖慎守須明制約自今已後監司官吏  
不得更與朝官及諸色人等交通往來委御史臺察訪

舊唐書卷三十六

舊唐書卷三十六考證

天文志下沙門一行又增損其書○

臣召南

按新志詳

載一行分野之說此志但識十二次梗概無所發明故讀新志乃知舊書之闕略也

南屆鉅野○

臣召南

按舊本作鉅鹿非是此言魯地安

得及趙分之鉅鹿耶且鉅鹿在魯北非在南也今改正

又東至於呂梁○

臣召南

按當云南至於呂梁非東也

又下文得漢東平魯國以新志証之魯國下當有琅邪東海泗水城陽八字

昂畢大梁之次○

臣德潛

按十二次各為一段舊本接

連前文非也今提行改正

皆鷄首分也○鷄首誤三首已改正

尾得雲漢之末流○

臣名南

按一行山河兩戒之說下

晰山川脉絡上應雲漢始終自古言分野者舉莫之及然其義實原本於史遷天官書曰中國山川東北

流其維首在隴蜀尾沒於勃碣此即兩戒之說所自也雲漢起于東井訖于尾箕故曰尾得雲漢之末流四年閏正月丁卯朔。臣德潛按此貞觀四年日蝕之變也考本紀三年閏十二月則四年不當閏正月應誤

十三年甲戌有司奏合蝕不蝕。沈炳震曰甲戌上無月闕文考本紀當是八月

貞元二年八月辛巳朔日蝕。沈炳震曰本紀在三年

八月此誤

舊唐書卷三十六考證



欽定四庫全書

舊唐書卷三十七

後晉司空同中書門下平章事劉 昫撰

志第十七

五行

昔禹得河圖洛書六十五字治水有功因而寶之殷太師箕子入周武王訪其事乃陳洪範九疇之法其一曰五行漢興董仲舒劉向治春秋論災異乃引九疇之說附

于二百四十二年行事以推咎徵天人之變班固叙漢史採其說入五行志綿代史官因而續之今略舉大端以明變怪之本經曰水曰潤下火曰炎上木曰曲直金曰從革土爰稼穡又曰建用皇極傳曰畋獵不時飲食不享出入不節奪民農時及有姦謀則木不曲直棄法律逐功臣殺太子以妾為妻則火不炎上好治宮室飾臺榭內淫亂犯親戚侮父兄則稼穡不成好戰功輕百姓飾城郭侵邊境則金不從革簡宗廟不禱祠廢祭祀逆

天時則水不潤下經曰敬用五事謂貌曰恭言曰從視  
曰明聽曰聰思曰睿恭作肅從作乂明作哲聰作謀睿  
作聖又曰建用皇極皇建其有極傳曰貌之不恭是謂  
不肅厥咎狂厥罰恒雨厥極凶時則有服妖時則有龜  
孽時則有雞禍時則有下體生上之病時則有青眚青  
祥凡草木之類謂之妖蟲豸之類謂之孽六畜謂之禍及人謂之病甚則異物生謂之青身外而來謂之祥也  
言之不從是謂不乂厥咎僭厥罰恒暘厥疾憂時則  
有詩妖時則有介蟲之孽時則有犬禍時則有口舌之

痾時則有白青白祥視之不見是謂不哲厥咎豫厥罰  
恒燠厥極疾時則有草妖時則有羸蟲之孽時則有羊  
禍時則有目痾時則有赤青赤祥聽之不聰是謂不謀  
厥咎急厥罰恒寒厥極貧時則有鼓妖時則有魚孽時  
則有豕禍時則有耳痾時則有黑青黑祥思之不睿是  
謂不聖厥咎蒙厥罰恒風厥疾凶短折時則有脂夜之  
妖時則有華孽時則有牛禍時則有心腹之痾時則有  
黃青黃祥皇之不極是謂不建厥咎眊厥罰恒陰厥極

弱時則有射妖時則有龍蛇之孽時則有馬禍時則有  
下體代上之病時則有日月亂行星辰逆行九疇名數  
十五其要五行皇極之說前賢所以窮治亂之變談天  
人之際蓋本於斯故先錄其言以傳於事京房易傳曰  
臣事雖正專必地震其震於水則波於木則搖於屋則  
瓦落大經在辟而易臣茲謂陰動又曰小人剝廬厥妖  
山崩茲謂陰乘陽弱勝強劉向曰金木水沴土地所以  
震春秋災異先書地震日蝕惡陰盈也

貞觀十二年正月二十二日松叢二州地震壞人廬舍  
二十年九月十五日靈州地震有聲如雷二十三年八  
月一日晉州地震壞人廬舍壓死者五十餘人三日又  
震十一月五日又震永徽元年四月一日又震六月  
十二日又震高宗顧謂侍臣曰朕政教不明使晉州之  
地屢有震動侍中張行成曰天陽也地陰也陽君象陰  
臣象君宜轉動臣宜安靜今晉州地震彌旬不休臣將  
恐女謁用事大臣陰謀且晉州陛下本封今地屢震尤

彰其應伏願深思遠慮以杜其萌帝深然之 開元二  
十二年二月十八日秦州地震先是秦州百姓聞州西  
北地下殷殷有聲俄而地震壞廨宇及居人廬舍數千  
間地坼而復合震經時不定壓死百餘人玄宗令右丞  
相蕭嵩致祭山川又遣倉部員外郎韋伯陽往宣慰存  
恤所損之家 至德元年十一月辛亥朔河西地震有  
聲地裂陷壞廬舍張掖酒泉尤甚至二年六月始止  
大曆二年十一月壬申京師地震有聲自東北來如雷

者三四年二月丙辰夜京師地震有聲如雷者三 貞  
元三年十一月己卯夜京師地震是夕者三巢鳥皆驚  
人多去室東都蒲陝亦然四年正月朔日德宗御含元  
殿受朝賀是日資明殿階及欄檻三十餘間無故自壞  
甲士死者十餘人其夜京師地震二日又震三日又震  
十八日又震十九日又震二十日又震帝謂宰臣曰蓋  
朕寡德屢致后土震驚但當修政以答天譴耳二十三  
日又震二十四日又震二十五日又震時金房州尤甚



江湓山裂屋宇多壞人皆露處至二月三日壬午又震  
甲申又震乙酉又震丙申又震三月甲寅又震己未又  
震庚午又震辛未又震京師地生毛或白或黃有長尺  
餘者五月丁卯又震八月甲辰又震其聲如雷九年四  
日辛酉京師又震有聲如雷河中尤甚壞城壘廬舍地  
裂水涌十年四月戊申又震十三年十月乙未日午時  
震從東來湏臾而止 元和七年八月京師地震憲宗  
謂侍臣曰昨地震草樹皆搖何祥異也宰臣李絳曰昔

周時地震三川竭太史伯陽甫謂周君曰天地之氣不  
過其序若過其序人亂也人政乖錯則上感陰陽之氣  
陽伏而不能出陰迫而不能升于是有地震又孔子修  
春秋所紀災異先地震日蝕蓋地載萬物日君象政有  
感傷天地見書之示戒用儆後王伏願陛下體勵虔  
恭之誠動以利萬物綏萬方為念則變異自消休徵可  
致九年三月丙辰雋州地震晝夜八十震方止壓死者  
百餘人 太和九年三月乙卯京師地震 開成元年

二月乙亥夜四更京師地震屋瓦皆墜戶牖之間有聲  
二年十一月乙丑夜地南北微震 大中三年十月京

師地震振武天德靈武鹽夏等州皆震壞軍鎮廬舍

武德六年七月二十日雋州山崩川水咽流 貞觀八

年七月七日隴右山崩大蛇屢見太宗問秘書監虞世

南曰是何災異對曰春秋時梁山崩晉侯召伯宗而問

焉對曰國主山川故山崩川竭君為之不舉降服出次

祝幣以禮焉晉侯從之卒亦無害漢文帝九年齊楚地

二十九山同日崩文帝出令郡國無來獻施惠于天下  
遠近歡洽亦不為災後漢靈帝時青蛇見御座晉惠帝  
時大蛇長三百步經市入廟今蛇見山澤蓋深山大澤  
實生龍蛇亦不足怪也唯脩德可以消變上然之十七  
年八月四日原州昌松縣瀉池谷有石五青質白文成  
字曰高皇海出多子李元王八十年太平天子李世民  
千年太子李治書燕山人士樂太國主尚汪潭獎文仁  
邁千古大王五王六王七王十鳳毛才子七佛八菩薩

及上果佛田天子文武貞觀昌大聖延四方上下治示  
孝仙戈八為善原州奏其年十一月三日遣使祭之曰  
嗣天子某祚繼鴻業君臨寓縣夙興盥食無忘于政導  
德齊禮愧於前修天有成命表瑞貞石文字昭然歷數  
唯永旌旌高廟之業又錫眇身之祚迨于皇太子治亦  
降貞符具紀姓氏列于石言仰瞻睿漢空銘大造甫惟  
寡薄彌增寅懼敢因大禮重薦玉帛上謝明靈之貺以  
申祇慄之誠祇永徽四年八月二十日隕石十八于同

州馮翊縣光曜有聲如雷上問于志寧曰此何祥也當  
由朕政之有闕對曰按春秋隕石于宋五內史過曰是  
陰陽之事非吉凶所生自古災變杳不可測但恐物之  
自爾未必關於人事陛下發書誠懼責躬自省未必不  
為福矣 永昌中華州數水店西南坡白晝飛四五里  
直抵赤水其坡上樹木禾黍宛然無損 則天時新豐  
縣東南露臺鄉因大風雨電震有山踊出高二百尺有  
池周三頃池中有龍鳳之形禾黍之異則天以為休徵

名為慶山荊州人俞文俊詣闕上書曰臣聞天氣不和而寒暑隔人氣不和而疢贅生地氣不和而堆阜出今陛下以女主居陽位反易剛柔故地氣隔塞山變為災陛下以為慶山臣以為非慶也誠宜側身修德以答天譴不然恐災禍至則天怒流于嶺南 開元十七年四月五日大風震電藍田山開百餘步 乾元二年六月虢州閬鄉縣界黃河內女媧墓天寶十三載因大雨晦冥失其所在至今年六月一日夜河濱人家忽聞風雨

聲比見其墓踊出上有雙柳樹下有巨石二柳各長丈餘郡守圖畫以聞今號風陵堆 大歷十三年郴州黃岑山崩震壓殺數百人 建中初魏州魏縣西四十里忽然土長四五尺數畝里人駭異之明年魏博田悅反德宗命河東馬燧潞州李抱真討之營于陘山幽州朱滔恒州王武俊帥兵救田悅王師退保魏縣西朱滔武俊田悅引軍與王師對壘三年十一月朱滔僭稱冀王武俊稱趙王田悅稱魏王悅時壘正當土長之所及僭



署告天乃因其長土為壇以祭魏州功曹韋稔為益土  
頌以媚悅馬燧聞之笑曰田悅異常賊也 貞觀十一

年七月一日黃氣竟天大雨穀水溢入洛陽宮深四尺  
壞左掖門毀宮寺一十九洛水暴漲漂六百餘家帝引  
咎令羣臣直言政之得失中書侍郎岑文本曰伏唯陛  
下覽古今之事察安危之機上以社稷為重下以億兆  
為念明選舉慎賞罰進賢才退不肖聞過必改從諫如  
流為善在於不疑出令期於必信頤神養性省畋游之

娛去奢從儉減工役之費務靜方內不求闢土載索弓矢而無忘武備凡此數者願陛下行之不怠必當轉禍為福化咎為祥况水之為患陰陽常理豈可謂之天譴而繫聖心哉十三日詔曰暴雨為災大水泛溢靜思厥咎朕甚懼焉文武百寮各上封事極言朕過無有所諱諸司供進悉令減省凡所力役量事停廢遭水之家賜帛有差二十日詔廢明德宮及飛山宮之玄圃院分給河南洛陽遭水戶九月黃河泛溢壞陝州河北縣及太

原倉毀河陽中渾太宗幸白馬坂以觀之 永徽五年  
六月恒州大雨自二日至七日潯沱河水泛溢損五千  
三百家 總章二年七月益州奏六月十三日夜降雨  
至二十日水深五尺其夜暴雨深一丈已上壞屋一萬  
四千三百九十區害田四千四百九十六頃九月十八  
日括州暴風雨海水翻上壞永嘉安固二縣城百姓廬  
舍六千八百四十三區殺人九千七十牛五百頭損田  
苗四千一百五十頃 咸亨元年五月十四日連日澍

雨山水溢溺死五千餘人 永淳元年六月十二日連  
日大雨至二十三日洛水大漲漂損河南立德弘敬洛  
陽景行等坊二百餘家壞天津橋及中橋斷人行累日  
先是頃降大雨沃若懸流至是而泛溢衝突焉西京平  
地水深四尺已上麥一束止得一二升米一斗二百二  
十文布一端止得一百文國中大饑蒲同等州沒徙家  
口并逐糧饑餒相仍加以疾疫自陝至洛死者不可勝  
數西京米斗三百已下二年三月洛州黃河水溺河陽

縣城水面高於城內五六尺自鹽坎已下至縣十里石  
灰並平流涯橋南北道無不碎破 文明元年十月溫  
州大水漂流四千餘家 長安三年寧州大霖雨山水  
暴漲漂流二千餘家溺死者千餘人流屍東下十七日  
京師大雨雹人有凍死者四年自九月至十月晝夜陰  
晦大雨雪都中人畜有餓凍死者令開倉賑恤 神龍  
元年七月二十七日洛水漲壞百姓廬舍二千餘家詔  
九品已上直言極諫右衛騎曹宋務先上疏曰臣聞自

昔后王樂聞過罔不興拒忠諫罔不亂何者樂聞過則下情通下情通則政無缺此其所以興也拒忠諫則羣議壅羣議壅則主孤立此其所以亂也伏見明勅令文武九品已上直言極諫大哉德音其堯舜之用心禹湯之責已也臣嘗讀書觀天人相與之際考休咎冥符之兆有感必通其間甚密是以政失於此變生於彼亦猶影之像形響之赴聲動而輒隨各以類應故易曰天垂象見吉凶聖人象之竊見自夏已來水氣悖戾天下郡

國多罹其災去月二十七日洛水暴漲漂損百姓謹按  
五行傳曰簡宗廟廢祭祀則水不潤下夫王者即位必  
郊祀天地嚴配祖宗是故鬼神歆饗多獲福助自陛下  
光臨寶極綿歷炎涼郊廟遲留不得殷薦山川寂莫未  
議懷柔暴水之災殆因此發臣又按水者陰類臣妾之  
道陰氣盛滿則水泉迸溢加之虹蜺紛錯暑雨滯淫雖  
丁厥時而汨恒度亦陰勝之沴也臣恐後庭近習或有  
離中饋之職干外朝之政伏願深思天變杜絕其萌又

自春及夏牛多病死疫氣浸淫于今未息謹按五行傳  
曰思之不睿時則有牛禍意者萬機之事陛下或未躬  
親乎昔太戊有異木生于朝伊陟戒以脩德厥妖用殄  
高宗有飛雉雉于鼎祖已陳以政事殷道再興此皆視  
履考祥轉禍為福之明鑑也晁錯曰五帝其臣不及則  
自親之今朝廷怪異雖則多矣然皆仰知陛下天光大  
願勤思德容少凝大化以萬方為念不以聲色為娛以  
百姓為憂不以犬馬為樂暫勞宵旰用緝明良豈不休



哉天下幸甚臣聞三王之朝不能免淫亢太平之時不能無小孽備禦之道存乎其人若細微之災恬而不怪及禍變成象駭而圖之猶水決而繕防疾困而求藥雖復僂俛亦何救哉夫災變應天實繫人事故日蝕脩德月蝕脩刑若乃雨暘或愆則貌言為咎雩禱之法在于禮典今暫逢霖雨即閉坊門弃先聖之明訓遵後來之淺術時偶中之安足神耶蓋當屏翳收津豐隆戢響之日也豈有一坊一市遂能感召星靈暫閉暫開便欲發

揮神道必不然矣何其謬哉至今巷議街言共呼坊門  
為宰相謂能節宣風雨變理陰陽夫如是則赫赫師尹  
便為虛設悠悠蒼生復何所望自數年已來公私俱竭  
戶口減耗家無接新之儲國無候荒之蓄陛下不出都  
邑近觀朝市則以為率土之人既康且富及至踐閭陌  
視鄉亭百姓衣牛馬之衣食犬彘之食十室而九空丁  
壯盡於邊塞孤嫠轉於溝壑猛吏淫威奮其毒暴徵急  
政破其資馬困斯跌人窮乃詐或起為姦盜或競為流

亡從而刑之良可悲也臣觀今之氓俗率多輕佻人貧而奢不息法設而偽不止長吏貪冒選舉私謁樂多繁淫器尚浮巧稼穡之人少商旅之人多誠願坦然更化以身先之端本澄源滌瑕蕩穢接凋殘之後宜緩其力役當久弊之極宜法訓敦龐良牧樹風賢宰垂化十年之外生聚方足三代之美庶幾可及臣聞太子者君之貳國之本易有其卦天有其星今古相循率由茲道陛下自登皇極未建元良非所以守器承祧養德贊業離

明不可輟曜震位不可久虛伏願早擇賢能以光儲副  
上安社稷以慰黎元且姻戚之間謗議所集假令漢帝  
無私於廣國元規切讓於中書天下之人安可戶說稽  
疑成患馮寵生災所謂愛之適足以害之至如武三思  
等誠能輟其機務授以清閒厚祿以富其身蕃錫以獎  
其意家國俱泰豈不優乎夫爵賞者君之重柄傳曰惟  
名與器不可假人自頃官賞頗亦乖謬大勲未滿于人  
聽高秩已越于朝倫貪天之功以為己力秘書監鄭普

思國子祭酒葉靜能或挾小道以登朱紫或因淺術以  
取銀黃既虧國經實悖天道書曰制理於未亂保邦於  
未危此誠理亂安危之時也伏願欽祖宗之丕烈傷王  
業之艱難遠佞人親有德乳保之愛妃主之家以時接  
見無令媒瀆凡此數者當今急務唯陛下留神採納永  
保康寧疏奏不省右僕射唐休璟以霖雨為害咎在主  
司上表曰臣聞天運其工人代之而為理神行其化為  
政資之以和得其理則陰陽以調失其和則災沴斯作

故舉才而授帝唯其難論道於邦官不必備頃自中夏  
及乎首秋郡國水災屢為人害夫水陰氣也臣實主之  
臣忝職右樞致此陰沴不能調理其氣而乃曠居其官  
雖運屬堯年則無治水之用位侔殷相且闕濟川之功  
猶負明刑坐逃皇譴皇恩不棄其若天何昔漢家故事  
丞相以天災免職臣竊遇聖時豈敢覲顏居位乞解所  
任待罪私門冀移陰咎之徵復免夜行之咎 神龍二  
年三月壬子洛陽東十里有水影月餘乃滅四月洛水

泛溢壞天津橋漂流居人廬舍溺死者數千人三年滄  
州雨雹大如雞卵 開元五年六月十四日鞏縣暴雨  
連日山水泛漲壞郭邑廬舍七百餘家人死者七十二  
汜水同日漂壞近河百姓二百餘戶八年夏契丹寇營  
州發關中卒援之軍次澠池縣之闕門野營穀水上夜  
半山水暴至二萬餘人皆溺死唯行網役夫擣蒲覺水  
至獲免逆旅之家溺死死人漂入苑中如積其年六月  
二十一日夜暴雨東都穀洛溢入西上陽宮宮人死者

十七八畿內諸縣田稼廬舍蕩盡掌關兵士凡溺死者  
一千一百四十八人京城興道坊一夜陷為池一坊五  
百餘家俱失其年鄧州三鴉口大水塞谷初見二小兒  
以水相潑湏臾有大蛇十圍已上張口向天人或斫射  
之俄而暴雨漂溺數百家十年二月四日伊水泛漲  
毀都城南龍門天竺奉先寺壞羅郭東南角平地水深  
六尺已上入漕河水次屋舍樹木蕩盡河南汝許仙豫  
唐鄧等州各言大水害秋稼漂沒居人廬舍十四年六



月戊午大風拔木發屋端門鴟吻盡落都城内及寺觀落者約半七月十四日灋水暴漲流入洛漕漂沒諸州租船數百艘溺死者甚衆漂失揚壽光和廬杭瀛棣租米一十七萬二千八百九十六石并錢絹雜物等因開斗門決堰引水南入洛漕水燥竭以搜漉官物十收四五馬七月甲子懷衛鄭滑汴濮許等州澍雨河及支川皆溢人皆巢舟以居死者千計資產苗稼無孑遺滄州大風海運船沒者十一二失平盧軍糧五千餘石舟人

皆死潤州大風從東北海濤奔上沒瓜步洲損居人是  
秋天下八十五州言旱及霜五十州水河南河北尤甚  
十五年七月甲寅雷震興教門樓兩鴟吻燒樓柱良久  
乃滅二十日鄜州雨洛水溢入州城平地丈餘損居人  
廬舍溺死者不知其數二十一日同州損郭邑及市毀  
馮翊縣八月八日沔池六十三州大水損禾稼居人廬  
舍河北尤甚十八年六月乙丑東都瀍水暴漲漂損揚  
楚淄德等州租船壬午東都洛水泛漲壞天津永濟二

橋及漕渠斗門漂損提象門外助鋪及仗舍又損居人  
廬舍千餘家二十七年八月東京改作明堂訛言官取  
小兒埋于明堂下以為厭勝村邑童兒藏于山谷都城  
騷然或言兵至玄宗惡之遣主客郎中王伋往東都及  
諸州宣慰百姓久之乃定二十九年暴水伊洛及支川  
皆溢損居人廬舍秋稼無遺壞東都天津橋及東西漕  
河南北諸州皆多漂溺天寶十載廣陵郡大風駕海潮  
淪江口大小船數千艘十三載秋京城連月澍雨損秋

稼九月遣閑坊市北門蓋井禁婦人入街市祭玄冥大  
社崇門京城坊市牆宇崩壞向盡東方漚洛水溢隄穴  
衝壞一十九坊 上元二年京師自七月霖雨八月盡  
方止京城宮寺廬舍多壞街市溝中渠漉得小魚 永  
泰元年先旱後水九月大雨平地水數尺溝河漲溢時  
吐蕃寇京畿以水自潰而去二年夏洛陽大雨水壞二  
十餘坊及寺觀廨舍河南數十州大水 大歷四年秋  
大雨是歲自四月霖澍至九月京師米斗八百文官出

太倉米賤糶以救饑人京城閉坊市北門門置土臺臺上置壇及黃幡以祈晴秋末方止五年夏復大雨京城饑出太倉米減價以救人十二年秋大雨是歲春夏旱至秋八月雨河南尤甚平地深五尺河決漂溺田稼

貞元二年夏京師通衢水深數尺吏部侍郎崔縱自崇義里西門為水漂浮行數十步街鋪卒救之獲免其日溺死者甚衆東都河南荆南淮南江河泛溢壞人廬舍四年八月連雨灞水暴溢溺殺渡者百餘人八年秋大

雨河南河北山南江淮凡四十餘州大水漂溺死者二萬餘人時幽州七月大雨平地水深二丈鄭涿薊檀平五州平地水深一丈五尺又徐州奏自五月二十五日雨至七月八日方止平地水深一丈二尺郭邑廬里屋宇田稼皆盡百姓皆登丘塚山原以避之 元和七年正月振武界黃河溢毀東受降城五月饒撫虔吉信五州山水暴漲壞廬舍虔州尤甚水深處四丈餘八年五月許州奏大雨摧大隗山水流出溺死者千餘人六月

庚寅京師大風雨毀屋揚瓦人多壓死水積城南深處  
丈餘入明德門猶漸車輻辛卯渭水暴漲毀三渭橋南  
北絕濟者一月時所在霖雨百源皆發川瀆不由故道  
丙申富平大風折樹一千二百株辛丑出宮人二百車  
人得娶納以水害誠陰盈也九年秋淮南宣州大水十  
一年五月京畿大雨害田四萬頃昭應尤甚漂溺居人  
衢州山水涌深三丈壞州城民多溺死浮梁樂平溺死  
者一百七十人為水漂流不知所在者四千七百戶潤

常湖陳許等州各損田萬頃十二年秋大雨河南北水  
害稼其年六月京師大雨街市水深三尺壞廬舍二千  
家舍元殿一柱陷十五年九月十一日至十四日大雨  
兼雪街衢禁苑樹無風而摧折連根而拔者不知其數  
仍令閉坊市北門以禳之滄州大水長慶二年十月  
好時山水泛漲漂損居人三百餘家河南陳許二州尤  
甚詔賑貸粟五萬石量人戶家口多少等第分給太  
和三年四月同官暴水漂沒三百餘家六年徐州自六



月九日大雨至十一日壞民舍九百家四年夏鄆曹濮  
雨壞城郭田廬向盡蘇湖二州水壞六堤水入郡郭溺  
廬井許州自五月大雨水深八尺壞郡郭居民大半

會昌元年七月襄州漢水暴溢壞州郭均州亦然則

天時宗秦客以佞幸為內史受命之日無雲而雷聲震  
烈未周歲而誅延和元年六月河南偃師縣之李材

村有霹靂閃入人家地震裂潤丈餘長十五里測之無  
底所裂之處井廁相通所衝之家棺柩出植平地無損

竟不知其故 儀鳳三年十一月十四日雨木冰開元  
十五年七月四日雷震興教門兩鵠吻欄檻及柱災二  
十九年十一月二十二日雨木冰凝寒凍冽數日不解  
寧王見而歎曰諺云樹稼達官怕必有大臣當之其月  
王薨 乾元三年閏四月大霧大雨月餘是月史思明  
再陷東都京師米斗八百文人相食殍骸蔽地 永泰  
元年二月甲子夜雷電震烈三月降霜為木冰辛亥大  
風拔木 大曆二年三月辛亥夜京師大風發屋十一

月紛霧如雪草木冰十年四月甲申夜大雨雹暴風拔  
樹飄屋瓦宮寺鳩吻飄失者十五六人震死者十二損  
京畿田稼七縣七月己未夜杭州大風海水翻潮飄蕩  
州郭五千餘家船千餘隻全家陷溺者百餘戶死者四  
百餘人蘇湖越等州亦然 貞元二年正月大雨雪平  
地深尺餘雪上有黃色狀如浮埃四年正月陳留十里  
許雨木皆大如指長寸餘木有孔通中所下立者如植  
其年宣州暴雨震電有物墮地猪首手脚各有兩指執

一赤班蛇食之逡巡黑雲合不見八年二月京師雨土  
五月己未暴風破屋拔樹太廟屋及諸門寺署壞者不  
可勝計十年六月辛丑晦有水鳥集於左藏庫其夜暴  
雨大風拔樹十七年二月五日大雨雹七日大霜十六  
夜大雨震雷且電十九日大雨雪而電 元和三年四  
月壬申大風毀含元殿西闕欄檻二十七間八年三月  
丙子大風拔崇陵上宮衙殿西鵠尾并上宮西神門六  
戟竿折行牆四十間簷壞 長慶元年九月壬寅京師

震電大風雨四年五月庚辰大風吹壞延喜景風二門  
太和八年六月癸未暴風雷雨壞長安縣廨及經行  
寺塔同華大旱七月辛酉定陵臺大風雨震東廊之下  
地裂一百三十尺其深五尺詔宗正卿李仍叔啟告修  
之九年四月二十六日夜大風含元殿四鴟吻皆落拔  
殿前樹三壞金吾仗舍發樓觀內外城門數處光化門  
西城牆壞七十七步是日廢長生院起內道場取李訓  
言沙汰僧尼故也 開成元年夏六月鳳翔麟遊縣暴

風雨飄害九成宮正殿及滋善寺佛舍壞百姓屋三百  
間死者百餘人牛馬不知其數 長安四年九月後霖  
雨并雪凡陰一百五十餘日至神龍元年正月五日誅  
二張孝和反正方晴霽 先天二年四月陰至六月一  
百餘日至七月三日誅竇懷貞等一十七家方晴 景  
龍中東都霖雨百餘日閉坊市北門駕車者苦甚污街  
中言曰宰相不能調陰陽致滋恒雨令我污行會中書  
令楊再思過謂之曰於理則然亦卿牛劣耳 貞元二

十一年順宗風疾叔文用事連月霖雨不霽乃以憲宗  
為皇太子制出日即晴傳所謂皇之不極厥罰恒陰皆  
此數也 貞觀二年六月京畿旱蝗食稼太宗在苑中  
掇蝗咒之曰人以穀為命而汝害之是害吾民也百姓  
有過在予一人汝若通靈但當食我無害吾民將吞之  
侍臣恐上致疾遽諫止之上曰所冀移災朕躬何疾之  
避遂吞之是歲蝗不為患 開元四年五月山東螟蝗  
害稼分遣御史捕而埋之汴州刺史倪若水拒御史執

奏曰蝗是天災自宜修德劉聰時除既不得為害滋深  
宰相姚崇牒報之曰劉聰偽主德不勝妖今日聖朝妖  
不勝德古之良守蝗蟲避境若言修德可免彼豈無德  
致然今坐為食苗忍而不救因此饑饉將何以安卒行  
埋瘞之法獲蝗一十四萬乃投之汴河流者不可勝數  
朝議喧然上復以問崇崇對曰凡事有違經而合道反  
道而適權者彼庸儒不足以知之縱除之不盡猶勝養  
之以成災帝曰殺蟲太多有傷和氣公其思之崇曰若



救人殺蟲致禍臣所甘心八月四日勅河南河北檢校捕蝗使狄光嗣康瓘敬昭道高昌賈彥璿等宜令待蟲盡而刈禾將畢即入京奏事諫議大夫韓思復上言曰伏聞河北蝗蟲頃日益熾經歷之處苗稼都盡臣望陛下省咎責躬發使宣慰損不急之務去至冗之人上下同心君臣一德持此至誠以答休咎前後捕蝗使望並停之上出符疏付中書姚崇乃令思復往山東檢視蟲災之所及還具以聞二十五年貝州蝗食苗有白鳥數

萬羣飛食蝗一夕而盡明年榆林關有蚘蚋食苗羣雀  
來食數日而盡 天寶三載貴州紫蟲食苗時有赤鳥  
羣飛自東北來食之 廣德元年秋蚘蚋食苗關西尤  
甚米斗千錢 興元元年秋關輔大蝗田稼食盡百姓  
饑捕蝗為食蒸曝颺去足翅而食之明年夏蝗尤甚自  
東海西盡河隴羣飛蔽天旬日不息經行之處草木牛  
畜毛靡有孑遺關輔已東穀大貴餓饉枕道京師大亂  
之後李懷光據河中諸軍進討國用罄竭衣冠之家多

有殍殍者旱甚灞水將竭井皆無水有司奏國用裁可  
支七旬德宗減膳不御正殿百司不急之費皆減之

元和元年夏鎮冀蝗害稼 長慶三年秋洪州旱螟蝗  
害稼八萬頃 太和元年秋旱罷選舉 開成二年河

南河北旱蝗害稼京師旱尤甚徙市閉坊南門四年六  
月天下旱蝗食田禱祈無効上憂形於色宰臣曰星官  
奏天時當爾乞不過勞聖慮文宗慄然改容曰朕為天  
下主無德及人致此災旱今又彗星謫見于上若三日

內不雨當退歸南內卿等自選賢明之君以安天下宰  
臣嗚咽流涕不能已是歲河南府界黑蟲食苗河南河  
北蝗害稼都盡鎮定等州田稼既盡至于野草樹葉細  
枝亦盡 會昌元年山南鄧唐等州蝗害稼 貞觀十  
三年四月二十九日雲陽石燃方丈晝如炭夜則光見  
投草木於其上則焚歷年方止 證聖元年正月十六  
日夜明堂火延及天堂京城光照如晝至曙並為灰燼  
則天欲避殿徹樂宰相姚璹以為火因庥主人護不謹

非天災也不宜貶損乃勸則天御端門觀酺引建章故事令薛懷義重造明堂以厭勝之則天時建昌王武攸寧置內庫長五百步二百餘間別貯財物以求媚一夕為天災所燔玩好並盡景龍中東都凌空觀災火自東北來其金銅諸像銷鑠並盡開元五年洪潭二州災火延燒郡舍郡人先見火精赤皦皦飛來旋即火發十五年衡州災火延燒三四百家郡人見物大如竈赤如燭籠此物所至即火發十八年二月十八日大雨

雪俄又雷震飛龍廐災 天寶二年六月七日東都應  
天門觀災延燒左右延福門經日不滅九載三月華嶽  
廟災十載正月大風陝州運船失火燒二百一十五隻  
損米一百萬石舟人死者六百人又燒商人船一百隻  
其年八月六日武庫災燒二十八間十九架兵器四十  
七萬件 寶應元年十一月迴紇焚東都宜春院延及  
明堂甲子日而盡 廣德元年十二月二十五夜鄂州  
失火燒船三千船延及岸上居人二千餘家死者四五

千人 大歷十年二月莊嚴寺佛圖災初有疾風震雷  
薄擊俄而火從佛圖中出寺僧數百人急救之乃止棟  
宇無損 貞元七年蘇州火十九年四月家令寺火二  
十年四月開業寺火 元和四年御史臺舍火七年鎮  
州甲仗庫一十三間災節度使王承宗殺主守坐死者  
百餘人承宗方拒天軍而兵仗為災所焚天意嫉也十  
年四月河陰轉運院火十一月獻陵寢宮永巷火十一  
年十二月未央宮及飛龍草場火皆王承宗李師道謀

撓用兵陰遣盜縱火也時李師道於鄆州起宮殿欲謀  
僭亂既成是歲為災並盡俄而族滅 太和元年十月  
甲辰昭德宮火延燒至宣政東垣及門下省至晡方息  
八年十二月昭成宮火九年六月乙亥朔西市火 會  
昌三年六月萬年縣東市火燒屋宇貨財不知其數又  
西內神龍宮火 大順二年七月汴州相國寺佛閣災  
是日曉微雨震雷寺僧見赤塊在三門樓藤網中周遮  
一帀而火作良久赤塊北飛越前殿飛入佛閣藤網中如



三門周遶轉而火作如是三日不息訖為灰燼 貞觀  
初白鵲巢于殿庭之槐樹其巢合歡如腰鼓左右稱賀  
太宗曰吾常笑隋文帝好言祥瑞瑞在得賢白鵲子何  
益於事命掇之送于野 高宗文明後天下頻奏雌雄  
化為雄或半化未化兼以獻之則天臨朝之兆 調露  
元年突厥盟傳等未叛時有鳴鶚羣飛入塞相繼蔽野  
邊人相驚曰突厥雀南飛突厥犯塞之兆也至二年正  
月還復北飛至靈夏已北悉墜地而死視之皆無頭裴

行儉問右史苗神客曰鳥獸之祥乃應人事何也對曰  
人雖最靈而稟性含氣同於萬類故吉凶兆於彼而禍  
福應於此聖王受命龍鳳為嘉瑞者和氣同也故漢祖  
斬蛇而驗秦之必亡仲尼感麟而知已之將死夷羊在  
牧殷紂已滅鸛鵠來巢魯昭出奔甯舞端門燕刺誅死  
大鳥飛集昌邑以敗是故君子虔恭寅畏動必思義雖  
在幽獨如承大事知神明之照臨懼患難之及已雉升  
鼎耳殷宗側身以脩德鵬上坐隅賈生作賦以叙命卒

以無患者德勝妖也 大歷八年四月戊申乾陵上仙  
觀之尊殿有雙鵲銜泥及柴補殿之巢壞凡十五處其  
年九月大鳥見於武功殿羣鳥隨而噪之神策將軍張  
日芬射得之肉翅狐首四足足有爪其廣四尺三寸其  
毛色赤形類蝙蝠十一年渭州獲赤鳥十三年五月左  
羽林軍鸚鵡乳雀 貞元三年三月中書省梧桐樹有  
鵲以泥為巢四年夏汴鄭二州羣鳥皆飛入田緒李納  
境內銜木為城高二三尺方十里緒納惡之命焚之信

宿而復鳥口皆流血十年四月有大鳥飛集宮中食雜骨數日獲之不食而死六月辛未晦水鳥集左藏庫十四年秋有鳥色青類鳩鵲息於宋郊所止之處羣鳥翼衛朝夕嚙稻粱以哺之睢陽之人適野聚觀者旬日人不知其名郡人李翱見之曰此鸞也鳳之次長慶元年六月濮州雷澤縣人張憲家榆樹鳥巢因風墮二雛別樹鵲引二鳥雛於巢哺之開成二年六月真興門外野鵲巢於古塚永徽中黑齒常之戍河源軍有狼

三頭白晝入軍門射之斃常之懼求代將軍李謹代常  
之軍月餘卒 先天初洛陽市人牽一羊左肋下有人  
手長尺許以之乞丐 開元二年韶州鼠害稼千萬為  
羣三年有熊白晝入廣陵城月餘都督李處鑒卒 永  
泰二年十一月乾陵赤兔見 大歷二年三月河中獻  
玄狐四年九月己卯虎入京城長壽坊元載私廟將軍  
周皓格殺之六年八月丁丑太極殿內廊下獲白兔八  
年七月白鼠出內侍省十二年六月苑內獲白鼠十三年

六月戊戌隴右汧源縣軍士趙貴家貓鼠同乳不相害  
節度使朱泚寵之以獻宰相常袞率百寮拜表賀中書  
舍人崔祐甫曰此物之失性也天生萬物剛柔有性聖  
人因之垂訓作則禮迎貓為食田鼠也然貓之食鼠載  
在祀典以其能除害利人雖微必錄今此貓對鼠何異  
法吏不能觸邪疆吏不勤扞敵據禮部式錄三瑞無貓  
不食鼠之目以此稱慶理所未詳以劉向五行傳言之  
恐須申命憲司察聽貪吏誠諸邊境無失微巡則貓能

致功胤不為害帝深然之 建中四年五月滑州馬生  
角 貞元四年二月太僕寺郊牛生犢六足太僕卿周  
皓白宰相李泌請上聞泌笑而不答又京師人家豕生  
子兩首四足有司以白御史中丞竇參請上聞參寢而  
不奏三月癸丑鹿入京師西市門衆殺之 元和七年  
十一月龍州武安川會田中嘉禾生有麟食之復生麟  
之來一鹿引之羣鹿隨之光華不可正視使畫工圖麟  
及嘉禾來獻八年四月長安西市門家豕生子三耳八

足自尾分為二 太和九年八月易定監軍小將家馬  
因飲水吐出寶珠一獻之 貞觀中汾州言青龍見吐  
物在空中有光明如火墮地地陷掘之得玄金廣尺長  
七寸 大足元年虔州別駕得六眼龜一夕而失 神  
龍中渭河有蝦蟇大如一石鼎里人聚觀數日而失是  
歲大水漂溺京城數百家商州水入城門襄陽水至樹  
杪 先天二年六月西京朝堂磚堦無故自壞墻下有  
大蛇長丈餘蝦蟇大如盤面目赤如火相向鬪俄而蛇



入大樹蝦蟇入于草其年七月三日玄宗誅竇懷貞岑  
羲等十七家 開元四年六月郴州馬嶺山下有白蛇  
長六七尺黑蛇長丈餘兩蛇鬪白蛇吞黑蛇至巖處口  
眼流血黑蛇頭穿白蛇腹出俄而俱死旬日內桂陽大  
雨山水暴溢漂五百家殺三百餘人天寶中洛陽有巨  
蛇高丈餘長百尺出於芒山下胡僧無畏見之歎曰此  
欲決水注洛城即以天竺法咒之數日蛇死祿山陷洛  
之兆也 李揆作相前一月有大蝦蟇如牀見室之中

俄失所在占者以為篡天使也有福慶之事 乾元二

年九月通州三岡縣放生池中日氣下照水騰波涌上

有黃龍躍出高丈餘又於龍旁數處浮出明珠 大歷

八年京師金天門外水渠獲毛龜 貞元三年李納獻

毛龜 元和七年四月野州柯城縣有黃青白三龍各

一翼風雷自梅天陂起約高二百尺凡六里降于浮塘

坡九年四月道州二青龍見于江中 太和二年六月

七日密州卑產山北面有龍見初赤龍從西來續有青

龍黃龍從南來後有白龍黑龍從山北來並形狀分明  
自申至戌方散去 天寶初臨川郡人李嘉肩所居柱  
上生芝草狀如天尊像太守張景夫拔柱以獻 上元  
二年七月甲辰延英殿御座生白芝一莖三花肅宗製  
玉靈芝詩三篇羣臣皆賀占曰白芝主喪明年上皇肅  
宗俱崩二年九月含輝院生金芝 永泰二年二月京  
城槐樹有蟲食葉其形類蠶其年六月太廟第二室芝  
草生 大歷四年三月潤州上元縣芝草生一莖四葉

高七寸八年廬州廬江縣紫芝生高一丈五尺九年九月晉州神山縣慶唐觀檜樹已枯重榮十二年五月甲子城都府人郭遠因樵獲瑞木一莖有文曰天下太平四字其年十一日蔡州汝陽縣芝草生紫莖黃蓋興元元年八月亳州貞元縣大空寺僧院李樹種來十四年纔長一丈八尺今春枝忽上聳高六尺周圍似蓋九尺餘又先天太后墓槐樹上有靈泉漏出今年六月其上有雲氣五色又黃龍再見于泉上元和十一年十

二月雷桃李俱花 長慶三年十二月水不冰草萌芽

如正二月之候 神龍二年三月洛陽東七里有水影

側近樹木車馬之影歷歷見水影中月餘方滅 乾元

二年七月嵐州合河關黃河水四十里間清如井水經

四日而後復 寶應元年九月甲午華州至陝州二百

餘里黃河清澄澈見底 大歷二年醴泉出櫟陽愈疾

貞元四年七月自陝州至河陰河水色如墨流入汴

河止于汴州城下一宿而復 寶曆二年亳州言出聖

水愈病江淮已南遠來奔湊求水浙西觀察使李德裕  
奏論其妖宰相裴度判汴州所申狀曰妖由人興水不  
自作牒汴州觀察使損塞訖申 玄宗初即位東都白  
馬寺鐵像頭無故自落於殿門外後姚崇秉政以僧惠  
範附太平亂政謀汰僧尼令拜父母午後不出院其法  
頗峻 大歷十三年二月太僕寺廨有佛堂堂內小脫  
空金剛左臂上忽有黑汗滴下以紙承之色即血也明  
年五月代宗崩 上元三年楚州刺史崔旆獻定國寶

十三一曰玄黃天符形如笏長八寸有孔辟人間兵役  
二曰玉雞毛白玉也以孝理天下則見三曰穀璧白玉  
也粟粒無雕鐫之迹王者得之五穀豐熟四曰西王母  
白環二所在處外國歸伏六曰如意寶珠大如雞卵七  
曰紅靺鞨大如巨粟八曰琅玕珠二九曰玉玦形如玉  
環四分缺一十曰玉印大如半手理如鹿形陷入印中  
十一曰皇后採桑鉤如箸屈其末十二曰雷公石斧無  
孔十三缺凡十三寶寘之日中白氣連天初楚州有尼

曰真如忽有人接之昇天天帝謂之曰下方有災令第  
二寶鎮之即以十三寶付真如時肅宗方不豫以為瑞  
乃改元寶應仍傳位皇太子此近白祥也 寶歷二年  
五月神策軍修苑內古漢宮掘得白玉牀其長六尺以  
獻 大歷十年二月京兆神策昭應婦人張氏產一男  
二女 貞元八年二月許州人李鈎兒持杖上含元殿  
擊欄檻又擊殺所擒卒誅之十年四月巨人跡見常州  
元和二年開紅崖冶役夫將化為虎衆以水沃之化



而不果 長慶四年四月十七日染坊作人張韶與卜者蘇玄明於柴草車內藏兵仗入宮作亂二人對食於清思殿是日禁軍誅張韶等三十七人 寶曆二年十二月延州人賀文妻產三男 太和九年京師訛言鄭注為主上合金丹湏小兒心肝密旨捕小兒或相告云某處失幾兒人家扃鎖小兒甚密上恐遣中使喻之乃止 開成二年十二月二十八日狂人劉德廣入含元殿詔付京兆府杖殺之 隋末有謠云桃李子洪水繞

楊山煬帝疑李氏有受命之符故誅李金才後李密據  
洛口倉以應其讖 隋文時自長安故城東南移於唐  
興村置新都今西內承天門正當唐興村門今有大槐  
樹柯枝森鬱即村門樹也有司以行列不正將去之文  
帝曰高祖嘗坐此樹下不可去也 調露中高宗欲封  
嵩山累草儀注有事不行有謠曰不畏登不得但恐不  
得登三度徵兵馬旁道打騰騰高宗至山下遘疾還宮  
而崩 永徽末里歌有桑條韋也女時韋也樂及神龍

中韋后用事鄭恒作桑條歌十篇上之 龍朔中俗中  
飲酒令曰子母去離連臺拘倒俗謂盃盤為子母又名  
盤為臺即中宗廢於房州之應也時里歌有突厥鹽及  
則天遣尚書閻知微送武延秀立知微為可汗挾之入  
寇 如意初里歌云黃麀黃麀草裏藏彎弓射爾傷後  
契丹李萬榮叛陷營州則天令總管曹仁師王孝傑等  
將兵百萬討之大敗於黃麀契丹乘勝至趙郡 垂拱  
已後東都有契苾兒歌皆淫豔之詞後張易之兄弟有

內嬖易之小字契必 元和小兒謠云打麥打麥三三  
三乃轉身曰舞了也及武元衡為盜所害是元和十年  
六月三日五行傳所謂詩妖皆此類也 上元中為服  
令九品已上佩刀礪等袋紛帨為魚形結帛作之為魚  
像鯉強之意也則天時此制遂絕景雲後又佩之張易  
之為母阿臧為七寶帳有魚龍鸞鳳之形仍為象牀犀  
簾則天令鳳閣侍郎李迥秀妻之迥秀不獲已然心惡  
其老薄之阿臧怒出迥秀為定州刺史中宗女安樂公

主有尚方織成毛裙合百鳥毛正看為一色旁看為一色日中為一色影中為一色百鳥之狀並見裙中凡造兩腰一獻韋氏計價百萬又令尚方取百獸毛為韉面視之各見本獸形韋后又集鳥毛為韉面安樂初出降武延秀蜀川獻單絲碧羅龍裙縷金為花鳥細如絲髮鳥子大如黍米眼鼻嘴甲俱成明目者方見之自安樂公主作毛裙百官之家多效之江嶺奇禽異獸毛羽採之殆盡開元初姚宋執政屢以奢靡為諫玄宗悉命宮

中出奇服焚之於殿廷不許士庶服錦繡珠翠之服自  
是採捕漸息風教日淳韋庶人妹七姨嫁將軍馮太和  
權傾人主嘗為豹頭枕以辟邪白澤枕以辟魅伏熊枕  
以宜男太和死再嫁嗣虢王及玄宗誅韋后虢王斬七  
姨首以獻此總言服妖也

舊唐書卷三十七

舊唐書卷三十七考證

五行志時則有下體代上之病。○此言皇之不極是謂不建之咎也。新書作下伐上之病。

總章二年七月益州奏六月十三夜降雨至二十日水深五尺云云。○新書作冀州。据本紀當從冀州。

九月十八日括州暴風雨海水翻上。○新書在六月。

昔大戊有異木生于朝伊尹戒以修德。厥妖用殄。○臣

德潛

按尚書君奭篇乃伊尹之子陟非尹也。今已改。

正

二十七年八月東京改作明堂記言官取小兒埋明堂  
下以為厭勝云云○臣德潛按前文俱志水溢此條  
不類也入訛言類中為合

上元三年楚州刺史崔旆獻定國寶十三其四曰西王  
母白環二所在處外國歸伏六曰如意寶珠形如雞  
卵○臣德潛按此明闕第五寶也据通鑑五曰碧色  
寶圓而有光新書亦沿舊志闕第五寶



元和二年開紅崖冶○新書作洪崖冶

長慶四年四月十七日染坊作人張韶一條○已載天  
文志災異中此重見

舊唐書卷三十七考證